




Faint vertical text on the left side of the page, likely bleed-through from the reverse side.

Faint vertical text on the right side of the page, likely bleed-through from the reverse side.



文恭集卷七

奏議

論郊丘定配

臣竊以國家乘火而王火于五行其神屬禮漢書天文志曰火禮以此而言國家常須參攷典禮以順火性伏覩京師自秋不雨綿歷三時聖心焦勞臣下隕越思所以消救之道未知所出伏惟陛下明德恤祀虔恭郊廟宜蒙福應乃遵災旱古者祭天神無二主禮專一所以奉天帝之尊明不敢瀆三代兩漢之盛莫之敢易唐初始有兼配之事垂拱中禮官希旨郊丘諸祠遂有三祖同配之禮開元十一年明皇親饗園丘禮官建議遂罷三祖同配之事除此之外未有一代三帝同配昊天之神禮國家至道三年詔書親郊園丘以太祖太宗竝配陛下卽位景祐二年詔禮部詳案典禮辨崇配之序詔書節文自今以往太祖定配二宗迭脩去年八月八日詔書今次南郊三聖竝脩後次卻依舊禮布告中外咸體丕懷

未踰旬日復有今後每遇南郊三聖並侑之詔竊尋詔旨先後不同此誠陛下至孝烝烝虞舜之用心也然有違典禮未合天衷致旱之由恐在于此臣愚欲望聖慈今後南郊乞且依去年八月八日詔書及景祐二年禮官所定太祖定配之典追寢去年八月二十四日今後每次南郊三聖並侑之詔告謝天地以順火性必蒙福祉之降足消災旱之異臣若心知不可口不敢言卽是長負陛下獎育之恩沒有餘責

論詳定官制

臣等昨奉敕爲翰林學士韓絳上言國家奄有四海承平百年官制未修方苦其陋欲望討論唐百官制及本朝官制品秩事件量加裁定正其名體等事奉聖旨差臣等同共詳定臣等累曾懇辭不蒙允許尋具劄子陳乞且未置局容臣等取前代官制將今日各官職位商度可改正者可裁損者可申明者各條三兩事先送中書門下更加商量若果有施行卽置局辟官次第刪定奉聖旨

依奏臣等今詳定到事件如左

一漢置丞相其後改置三公官皆公府辟召掾屬唐制以尚書門下中書三省長官爲宰相尚書令僕射侍中中書令是也官品未至者同中書門下三品今平章事卽其比也參知政事唐初亦是正相崔溫等嘗爲之國朝之制下宰相一等若用唐制正其名體則四輔之任當悉用平章依漢制卽須立丞相府

一唐制御史大夫一人中丞二人國朝之制大夫不置以中丞爲臺長他官或以給事中諫議大夫權之若欲改正官制置丞相府則大夫當復輕重乃等

一唐制無公卿爲樞密使五代用兵始與中書對掌機密欲改正官制當以院事還中書及尚書兵部

一尚書省二十四司旣爲虛名所以官冗員眾若欲正官制當罷三司二十四司及九卿官使有定員其郎官不在本省治職事者竝以前資及散官處之其莅外任者或依唐制置上中下等州刺

史及別駕之類隨官品任之或欲輕其權則已知某州刺史之類一文武散官及檢校兼官勳爵實封等在開元以前頗有實事于今雖散猶敘服色粗繁輕重其餘悉皆虛名無益治體欲改正官制當例行省罷若以假虛名而任實職兼存亦可

以上所謂改正者也略舉一隅若于今可行即推此類具正之一大理寺決天下之獄刑部覆之于事已足又加審刑院則爲駢衍欲裁損官制當以院事官屬還刑部

一吏部尚書侍郎分領銓事則當差以輕重分別流品今審官院掌京朝官磨勘差遣而流內銓次惟典州縣幕職官體制不倫欲裁損官制當以審官院職事歸尚書銓州縣幕職官歸侍郎銓一羣牧司提舉司糾察司之類皆古無此職欲裁損官制悉當省罷還屬尚書九卿

以上所謂裁損者也略舉一隅若于今可行即推此類具正之一左右史竝當隨宰相入立仗下以記言動今史官之任不及聞

前殿政事故德音善政多失紀錄欲申明復此舊制

一中書出制敕唐制竝經門下審覆然後尚書出告身經歷三省比來惟中書發敕虛置三省官名今欲申明復此制國朝令文具載

一國朝近制觀文殿大學士惟待舊相自資政殿大學士至天章閣待制以上其間多有無員數除授寔廣者繇邊幅不立也諸舊有員者宜依舊數未有者宜差定其員著爲久制以革濫員之濫一唐制舍人六人分判尚書六曹事所以佐丞相謹政令欲乞申明此制

一舊制九卿之職不隸尚書令卿監職事三司關領者宜取還寺監亦省侵官之類

一唐制左右丞相判尚書省事中書判門下省事中書舍人判中書省事國朝門下省權用近臣判之中書省即舍人年深者判與唐制略同准昨來言者稱近臣判省權太重攷按唐制似不如此

惟常袞自以同中書門下事卽當兼判中書省是時崔祐甫以舍
人判省謂袞侵官士論由此不平袞也

一三班自供奉官至殿侍差使之類唐制武選皆無此名目宜徙
置于外以區別華冗

一朝廷若欲從改正之說卽俟改正之後設官分職如周唐乃可
約六典著書垂之後世若未能如此而欲著書惟可將會要及諸
司編敕并格令刪繁取要今日官名粗書職分而已

以上所謂申明者也略舉一隅若于今可行卽推此類具正之
論罷上元放燈

臣或聞臣僚上言以今春開淘汴河興役至眾乞罷上元放燈以
防一切放燈誠非急務于公私無益然罷之亦須有名若以開河
爲言恐于體不大今東南數路災旱甚廣穀價翔踊民食飢乏又
河北水沴愁墊未息若惻然降旨藉此而罷則于名義甚大四方
觀聽必喜聖心有矜憐窮困之意或因晝日晴和車駕臨幸寺觀

燒香以祈民福足以慰都城士女之望伏候進止

論人使詣塔燒香

臣等今月十五日同契丹人使并三節人從詣相國寺普滿塔下
燒香竊見本塔屋宇損動四隅用枋木薦撐環遶其下吁可爲懼
退思延戎使燒香之意本欲以浮圖之勝誇示遠人若不繕完恐
非壯觀如惜軍國之物重爲之費卽乞將泗州塔下等處寺院施
利錢物早與修完及其未傾隕易爲施力若其摧圯所費益大取
進止

論臣僚進對密陳機事卽時外傳乞賜防閑

臣聞爲君難爲臣不易易大傳曰君不密則失臣臣不密則失身
春秋譏漏言以爲至戒君上不可不察也伏惟陛下躬大聖之姿
體至仁之量推誠接物降心求治每臣下進見莫不霽威嚴和顏
色問民俗之利病詢朝廷之得失此虞舜好察邇言之意也然其
間樞機所發禍機或隨臣下不可不慎也比來羣臣進對有所密

陳往往即時傳之在外豈非防閑之道未盡其要今後臣僚上殿欲乞嚴屏左右以防漏泄若此則忠言益進聖聰彌廣無機事不密之害伸近臣盡規之忠謹具奏聞謹奏

論楊懷敏不當除內侍都知
敕入內侍昭宣使眉州防禦使楊懷敏除入內侍副都知臣當草詞者臣聞昔懷敏先任入內侍省副都知管皇城司公事宿衛不謹致逆徒竊變震驚宮闈嚮非宗廟社稷之靈陛下乘輿幾殆及逆徒既獲又不坐死致規滅姦人之口天下之議罪在懷敏楊景宗二人而已臣每念此事痛心扼腕陛下仁聖不忍加重誅止解內職令居外任今因奏事忽有此命若再復內侍名職且赴本任是不久將復入內侍省之職也若再居內省則宿衛之變復未可知兼條制內臣都知副都知之職有過降充外任更不許再居舊職所以防一切之微深遠之法制也伏望陛下令有司檢詳舊制追寢今命法制一壞復之良難有此違礙臣不敢草制其中

書送到詞頭一道臣輒封還伏候進止

唐給事中袁高不草盧杞制書近年富弼亦曾封還詞頭上意解改命舍人草制臺諫論列皇祐元年十一月二十九日以昭宣使眉州防禦使懷敏充三陵副使

乞楊安國改官

臣竊聞侍講學士楊安國近有奏劄理會磨勘轉官事或聞安國改官已得四年有餘中書為安國會因舉官罰銅隔住一年至明年三月方該轉官安國授經老臣年近八十桑榆暮景光陰幾何況久侍講筵與其餘侍講不同緣此月十八日講畢周禮宜因此時欲乞陛下面賜安國改轉宣中書施行以為老臣授經之榮兼彰陛下重道之美書于記注實光聖德芻蕘之說惟賜采擇取進止

論差三館都監不合辟

臣伏以三館圖書之府朝廷育材之地用內臣為都監典領事務自來差除或許判官及館職自舉其人貴得謹良以接英俊近差

下三陵都監任從禮充其任近已身亡朝廷尚未除人竊緣判館之職罕與內臣相接縱有所舉亦未周知其履行今後三館都監有缺欲乞朝廷精擇其人以充取進止

繳進李康侯廣律判辭

據前權知滄州軍州事判官李康侯狀昨在任日著到廣律判辭十一卷通四册念康侯數年用心尋究律意根援典禮伏狀繳奏進呈者右具如前臣等竊以吏道之本法令爲師凡厥士人既霑利祿雖勤几案之決罕精律例之微前判官李康侯早登詞科深好法學因傳經義條爲事辭著成廣律判辭十一卷以廣律意志勤可采學尚足嘉幸值盛辰弗遺小善臣等謬承朝委典司銓集復叨近侍敢壅上聞其李康侯撰成廣律判辭十一卷共四册謹具狀繳進或稍有觀采伏望聖慈候刑部大理寺詳覆斷官有缺日特許先次除注勘會本人歷任竝無過犯在朝亦無親的骨肉食祿見在銓參選謹具狀奏聞伏候敕旨

論殿試攷校

臣竊見舊制攷校御試舉人卷子不過五六日催促了畢即便放榜誠是太速恐有未精近制御試許限半月日攷校蓋欲詳加掄覈務在精當然而采之眾論亦有未便或聞初攷與覆攷二處各限五日攷校須候日滿攷盡卷子定了等第方得次第關發如此卽覆攷與詳定所端間多日卻成畱滯況近來間歲科場人數卷子止于二百欲乞將來御試且依舊存半月日限攷校外降聖旨令初攷覆攷所更不限定日數但攷絕卷子定了等第卽便關送與彌封所令彌封所發往覆攷等處若于限內攷校了畢乞便放榜不須候滿半月兼免日久有所漏泄及免禁中久畱燈火不便取進止

論換巡尉

臣竊觀今夏四方州郡山水發溢至入城郭漂廬舍壞棧道等在五行水曰潤下爲害若此是失性逆理之象在易坎爲水爲盜宜

敕四方州郡長吏及逐路轉運使提刑等常切謹視盜賊應采取金銀銅鑛及鼓鑄錢幣聚集羣眾之處宜密設方略常爲警備部內巡檢縣尉捉賊使臣如有疾病昏昧及弛慢不堪居職者宜令具姓名體量聞奏下三品流內銓選差有材武勤幹之人充替或部下監當使臣有材幹之人其被體量者內有未至全然昏昧可以監當場務許令權且對換句當其縣尉未至全然昏昧者亦許于判司主簿內選擇對換句當一面奏聞乞從朝廷指揮正差若巡邏得人則能教習武藝整齊部眾邊防之道伏候進止

論弓手替換

臣謬奉朝寄預司民政今有管見輒敢敷言臣竊尋國朝舊制天下縣邑所置弓手本防賊盜選人才會弓弩者充初無年限許替之文蓋欲其役年深習慣武藝又周知山川道路險易姦寇窟穴之所若有盜發易爲擒獲編敕節文弓手惟老弱貧乏乞替本縣保明申本屬長吏體量差替亦慮縣邑受倖至天聖明道中江淮

饑饉妄有替換故立此制以防其弊然朝廷遣使安撫右司諫范仲淹奏乞今後弓手及七周年者許替歸農七年滿情願執役身手強壯能捉賊盜者州縣體量依舊執役尋范仲淹所奏蓋因災傷權宜建白以竟一時之勞係令有司銓揀其弓手強壯者不得一例差替自後諸處縣邑爲有上項指揮有司乘此受倖不問貧富老少勇怯纔及七年本縣便一例差替多是不申州長吏體量其間未及七年者甚多非徒新募弓手生疏不堪捕盜一爲弓手則不能力農非勸農敦本之意反爲良善之患欲望聖慈尊祖宗成憲勿輕改易庶幾倖門塞而天下安取進止

論北界點集事宜

臣聞近日契丹于燕代之間點集兵馬聲言西討夏國恐非其實謀兼前來國書商議未合近日橫使不至虜情難測忽此點集有可疑慮兼廣南蠻賊狂盛陷沒州郡朝廷方誅討用兵之際契丹不宜有謀若二寇竝興四方可慮國家貴權以濟事欲解紛難不

可循常理也若旬日間契丹不遣使來臣欲乞聖度詳度事體選
差能專對近臣往使北戎與議定國書固其鄰好雖事之成與不
成未可決定亦可以探得虜中動靜若果蓄異志必有違言便須
大爲之防以備邊境伏候進止

論詰責言官言事涉後宮之親

臣聞聖主說至言好崇諫所以廣治道防一切之未然也臣以螻
蟻竊觀陛下特稟上睿之德能聽大度之言數賞諫臣比擢臺職
推誠含垢美盡君人之量堯舜之用也近日聞臺官言事事涉後
宮之親出于風聞有旨詰責臣愚以謂諫官御史朝廷綱紀所寄
雖有過謬可且優容昔漢文賢主也袁盎直臣也帝所幸慎夫人
盎掌諫爭言涉不遜初雖怒終不加罪後慎夫人聞之復賜盎金
五百斤慎夫人所以能保榮寵者以能賞袁盎之直言也漢元帝
時馮野王昭儀之兄也德行高妙推爲第一時御史大夫缺公卿
多薦野王爲之帝曰吾若用野王爲之天下必以我私後宮之親

昔德宗謂李絳比諫官論奏不實欲出其尤絳曰此非陛下意必
儉人以此營誤上心自古納諫昌拒諫亡君尊如天臣卑如地干
不測之禍雖開納獎勵尚恐不至直士杜口非社稷福臣願陛下
鑒觀前史開納至言臣不勝區區之情

論充國公主議行冊禮

今月二十一日草福康公主特進充國公主制竊聞議行冊禮然
于事體頗有未便祖宗以來公主長主未有行此禮者昔漢明帝
封皇子悉半諸國明德馬皇后曰諸子食數縣不已儉乎帝曰我
子豈敢與先帝子等也唐貞觀中太宗長樂公主將出降帝令有
司資送倍于永樂公主魏徵曰不可引漢明帝之言爲對且曰天
子姊妹稱長公主加長字示有所尊崇或可情有淺深無容禮相
踰越太宗然其言入告長孫皇后遣使賜徵金帛陛下卽位以
來累曾進封魏國楚國二大長主亦不曾行冊禮今施于充國公
主是與大長公主相踰越兼以貴主之故賢妃亦蒙殊典有旨令

進諭告不行冊禮是母子之間一行一不行禮意尤不相稱書于史冊後世將有譏議必謂陛下偏于近情虧聖德之美臣願陛下采漢明之言開文皇之聰遵祖宗舊典如國朝公主曾行此禮行之粗且無嫌如其不會則宜且罷臣以陛下好忠諫納至言臣職在論思不敢不言

論太湖登在祀典

臣竊見吳中太湖卽禹貢震澤也廣三萬六千頃其水利溉蘇湖常三州之地而蘇湖爲多去二郡亦近湖中大小山七十有二洞庭林屋福地皆在其中商帆賈楫日相上下二郡各有湖廟而常州無廟蘇州廟在洞庭湖州廟在大錢口方俗目爲平水大王廟是也二郡小小叢祀皆祭而太湖獨不祭蓋幽祀典失載因循忽諸禮境內山川諸侯當祭國家儀文咸秩靡祀不崇其太湖欲乞下湖蘇常三州登在祀典春秋差官致祭取進止
論伐鼓于社當在正陽之月

昨觀六月之朔日有蝕之禮官奏行伐鼓于社之禮某受詔告祭大社是日雲氣擁護太陽纔食數分隱而不見至晚復有雷雨之應然自此數月陰雲相繼淫雨未息攷之書傳竊有感焉謹按尚書季秋辰弗集于房瞽奏鼓此則夏禮伐鼓之始也又按春秋左氏傳唯正月之朔慝未作杜氏注正月夏之四月周之六月謂正陽之月日有食之天子

伐鼓于社責羣陰也諸侯伐鼓于朝據傳而言它月則否穀梁救

日之法陳五兵五鼓亦在莊二十五年六月辛未朔亦正陽之月

也書傳交戾典禮不同太社主陰之神有國尊奉非當鼓之月而

行攻責書傳二說禮在可疑之間淫雨之來或恐緣此竊見太陽

禮院告報准中書劄子奉聖旨分遣臣僚詣宮觀寺院燒香祈晴

謹按祠令節文霖雨不止祈社宜因此祭兼祈太社太稷以息淫

雨之沴祠令所載于禮無嫌謹具狀申中書門下

同劉敞孫抃論四后配食

臣等謹按春秋傳曰大禘者何祭也未毀廟之主皆升合食于太

祖是以國朝事宗廟且百有餘年至禘之日別廟後主皆升合食
遵用以爲典制非無據也此皆更聖祖神宗盡心極慮制節垂法
以貽子孫者也未易輕改且宋家宗廟之禮參用歷代因時施宜
不專取于周唐何而言之如太宗真宗二帝並配三后孝章嘗母
儀天下而享于別宮淑德以元妃正嫡亦享于別宮原其憲章沿
革之始似出聖意自有所在若規以一家之學則紛然皆亂于上
矣且行之已久祝嘏宗史旣守以爲常若一旦輕議損益恐神靈
不安亦未必當先帝意也議者乃謂四后之主于合食則貴有所
屈于別享則尊得以伸然則且不疑于黜遠四后而獨豐于昵乎
他年有司攝事四后皆預合食也今陛下欲躬齋戒奉祖禰而
四后見黜不亦疑于此禮之煩而不能事其先妣乎受命之君
以創禮革典爲急繼體之君以承志遵法爲美先帝創之革之陛
下承之遵之臣曰可矣宗廟之祭至尊至重苟未能盡祖宗之意
則莫若守其舊禮疑文偏說未可盡據傳曰祭從先祖又曰有其

舉之莫敢廢也此之謂也臣愚以謂如其故便

文恭集卷七

文恭集卷八

奏議

論征蠻
臣竊見前代征討蠻寇所以爲難者以其保聚巢穴掠害邊境與師深入則有山林之阻久屯則有瘴霧之毒兵不得戰人多疫死此其所以爲難也今者邕土蠻賊盡率反黨遠棄窟穴頓于廣州堅城之下平地之上已六十餘日矣退則歸路至遠進則大軍已集以臣料之賊氣必沮或聞廣州雖有山林不至深險賊久留不去者此天亡之機也今涼風方至瘴氣已息賊處平壤官據堅城士卒相依弓弩得用天時肅殺宜行誅討江西等路雖苦水旱計其小熟及茲西成猶足以調撥贍軍助國討賊臣以此觀天時地利人事之形王師誅逆宜及秋冬不可逗畱更無機會楊旼謙默不伐深沈有算兼其忠孝出于天性誠堪屬以南伐總茲師律陛下宜申敕諸將稟其節制則軍眾有所統一號令得以施行今因

賊亡之機與天時之利參定滅賊之策勿貪一時之功戒之以在和訓之以持重多方設巧燒其船艦使賊不得下海賊若下海攻陷瓊管以爲窟穴卽介在海外王師無由致討矣乘間竊發入寇腹心則嶺南諸州被害無有已時更復遷延至春夏或誘合鹽賊或扇動羣蠻則江西諸路疲轉漕之役失耕稼之業大軍有疫死之懼懷思歸之心久則變生一切雖在發生之候必用誅伐之威夫逆天時虧地利失人和三者舉事之忌也臣愚狂妄輒謂方今之計宜先料賊之多少計兵之眾寡若賊有萬人王師須有三倍之勢料擇精卒習用長技品配其眾番休與戰彼寡我眾彼勞我逸利則督士苦戰不利則斂兵且止如此者三時待其衰困各懷去就乃可申購募之典赦脅從之罪則人思效順眾必離散然後合勢大舉以圖殄滅若失機會恐逆黨愈盛而後患滋大昔者食藿之人猶憂疆場負薪之語或益廊廟狂夫之言聖人擇焉謹具奏聞伏候敕旨

乞畱三御史劄子

臣竊以御史者天子耳目之官所以上廣聰明下防威福若有畏懦無狀緘默不言卽是尸祿素餐負陛下之任使罪之可也若其不畏強禦糾發姦違可謂能言是其本職旌之可也近聞臺官彈奏事連宰相陛下不置詔獄按問止令開封府訊狀憑劉宗盟一面單辭黜三人御史于朝政有損于人情未服昨日聞御史差敕畱中未下外議皆謂必是聖心覺悟不黜臺官人情莫不喜說剛猛御史自古難得今若逐去須別舉人所舉之人未必能勝此也近日謫見未息姦宄須防古人有言猛虎在深山藜藿爲之不采猶言直臣在朝姦臣遠避也臣欲乞降旨畱三御史在朝以警姦邪臣昨晚蒙宣召已曾面論此事欲乞聖慈更賜詳度乞慎選省府推判官提點刑獄

臣聞漢制刺史奉詔條察州秩六百石至卑也委之察一部者意在秩卑無所顧惜敢刺舉耳某年初置刺史部十三州文武名臣

欲盡委察今之轉運使大抵漢刺史之職也陟黜臧否興利除害莫不係之國初用官亦輕選才則重其間外計多著能名古人有言引一代之人理一代之務不借才于異代若謂方今乏人是誣一代之人也顧朝廷所選用何如耳若欲天下轉運使盡得其人莫若慎選省府推判官提點刑獄此三道者取才之要比來夤緣用人忽略此職一概置親厚之吏或假借橫勢之家故外計之任有以資敘而入往年葉清臣在三司判官不才者奏罷數人當時物論是之今稍稍復用矣天聖景祐之間屢降大敕舉提點刑獄頗亦得人近年多沿差遣敕上帶入選舉之法格而不行又罕見顯拔循吏爲之省府陛下惠綏元元勵精政治近制川廣知州通判知縣並須選差所以重遐方而矜遠俗也況轉運使提點刑獄表率部吏宣明風化可不慎擇哉宜得通民事綽有才望者居之若按舉稱職風績較然或增秩再畱或移莅劇郡俾久其任以伸厥能諸積久累官秩高而才下素望不著者不可使居其任恐墮

職事且非陛下求治之意

論除授宿衛帥臣

臣竊以殿前馬步軍等帥臣統陛下爪牙之兵爲陛下心腹之佐宿衛宮省拱扈宸極凡所進任固先出于聖意然後參訪大臣公議既同方可除授近來內外臣僚多舉武臣管軍此非臣下輕可論薦漢宣帝時丞相黃霸薦侍中樂陵侯史高爲太尉帝使尚書召霸曰樂陵侯高帷幄近臣朕之所自親君何越職而舉之尚書令丞相霸免冠謝罪數日乃決霸爲丞相薦高爲太尉以職事言之未爲過舉猶見詰責如此豈非以太尉掌武之官耶陸賈有言將相相和則權不分權不分則士豫附士豫附則國家安以此而言宿衛帥臣當選謹厚樸忠之人以總禁旅不宜輕用論薦以收私恩或任非其才則開隙生事國之利器所宜慎重

論河北邊備事宜

臣聞地有常險而國無常地此古今得失之勢異也古者北有盧

龍之塞白檀之險隔限南北中國得之控扼北狄今此二險虜反有之河北地形無險可守自河南北達于澶淵平壤二千里景德中一旦虜騎至河上當是時去祖宗纔四十年兵強將勇習知戰鬪至煩章聖親駕虜始懼而乞和河北名將帥楊延昭馬知節李允則何成矩孫全有盛名扈駕則李繼隆石保吉內臣則秦翰皆數經戰陣自河決商胡失橫隴故道中國亡大河之險虜乘虛擣滄景則山東危願用張宗益郭申錫言割濱缺德博以隸滄別爲一路屯兵以扼虜衝備不虞國之福也伏望聖慈特詔大臣講究速行

論邊界守約束

臣聞憂患之來多藏于細微而生于人之所忽自邊臣趙滋舉行界河打魚刈葦一切禁斷由此漢兵多與北鬪累年不絕和好之體一旦至此怨隙之開亦不在大去年八月庚寅大雨水今春彗孛謫見上天不言以文象示下陛下宜思內外憂患彌縫其缺蓋

有備則患不能深無釁則亂不能起界河武思趙用輩雖時立小忠皆不達大計宜密行戒約臣觀景德詔安撫司皆防微慎重自景德以後詔書數更北人打魚安于積習邊吏弛職不復譏呵及至舉行舊條而淵魚見察眾狙皆怒履霜已深堅冰且至願大臣早爲之備國家承平百年與敵通好者六十歲內外無患前所未有近年邊遽來上不過侵誣尺寸疆候此夷狄之常態縣寨之本職移文足以辦之何遽至興甲兵哉今搢紳中有恥燕薊外屬者若天時未與人事未至而欲妄意難成之福不如講和息民擇良將以守邊選能臣而修聘外固歡和之形內修守禦之備羈縻不絕守真宗仁宗法度以惠養元元則天下幸甚

論西夏事宜

臣聞漢武收河南地築朔方開置河西五郡中國得之以隔絕羌胡不得相通前世謂之斷匈奴右臂今盡爲夏國所有夏國主諒祚恃犬羊之眾濟凶父之惡去年不顧誓詔燒劫秦鳳涇原兩路

熟戶肆行殺掠滿意而去邊臣畏懦按兵不出朝廷降詔詰問拒
使者不之納及賀正人至以壕外地屬戶爲說此地慶曆中西蕃
溪洞所獻檢據甚直詔答已詳近日延州安撫司復奏夏國乞遣
使齎狀乘驛詣闕其意無他止是申尋前語圖起爭端臣恐疆場
之憂未息也如聞西人常有意闕秦中同家堡一帶蕃部正扼西
賊來路涇原若失此險無所隔閼賊馬一二日可至古渭古渭可
至則秦中搖矣雖聞今年歲在東井爲關中之福星家說鎮歲所
在不可加兵然五緯盈縮進退不常難可恃也彼若不畏天道輒
來犯順盈縮繫于天道成敗先于人謀若止是論議理壕外地界
朝廷必無開許彼見不許有必爭之舉大集羣醜以撓諸務如聞
西賊尚有窺伺邊隙結納熟戶之意欲望聖慈明戒邊帥豫備不
虞綏靖鎮撫明遣間探講練軍政以佚待勞彼知我有備決不敢
遽起事端

論邊事

臣竊以景德二年遼人乞和章聖深維遠慮務息邊氓俯屈至尊
下柔獷俗繼以仁宗聖德順成先志彌縫間隙得羈縻勿絕之義
自爾邊境長無風塵之警父老不識金革之事大德至恩在民深
矣國家承平百年其間通好居六十年前世所未有近日戎人移
建鋪居侵越代州疆界吏止之奮兵與漢兵鬪又雄州奏契丹人
騎兩過拒馬橋南伐去柳栽千餘放箭射歸信縣尉又界河舊制
北人不得取魚雖素有禁防或聞私亦曾采捕舊不聞有鬪爭之
事近年禁禦太密鬪爭不絕亦曾射傷巡檢殺死邏兵邊臣恬然
曾不爲怪朝廷奏報視爲閒事未審鬪爭不止其末如何皆積不
相能馴致此釁履霜之漸堅冰且至誠懼章聖和戎之策從此而
壞國家居常備陝西次及河東未嘗深畱意于河朔陝西河東兩
路兵官經朝廷選所得差多極邊城寨都監寨主之類則又許帥
保薦頗得土人曉識山川險易習知蕃戎情態又有內屬蕃部爲
之障蔽土兵蕃落保捷之屬皆便弓善戰以一路兵力得良帥制

之寇至可以戰可以守河東險固去年西賊燒劫涇原秦鳳熟戶
蕃部迄今環慶賊馬鈔掠未已然今年歲在東井東井秦分爲關
中之福星家之說鎮歲所在不可加兵宜勅沿邊諸將嚴兵爲待
賊若大舉犯順我得天道不宜縱敵兵法所謂敵加于己不得已
而應之者謂之應兵兵應者勝彼自守窟穴無所侵軼不宜提兵
深入自違天道前所謂朝廷未嘗深留意于河朔者豈非恃盟好
重改作防虜人之疑乎方今之計莫若外固懽和之形內修守禦
之備且河朔地形無險可守自雄莫以南平壤千里往時黃河流
入虜境無慮五七里自河決商胡不由橫隴故道河北水流散漫
失中國大河之險不能限隔戎虜盛冬冰合胡騎可過虜人若以
精騎擣滄景之虛長驅南下則京東搖矣河北雖有塘水城壁利
兵堅甲無所恃之臣非能知前後通邊事者言之多矣朝廷以北
虜無覺未暇經略今來邊釁已有萌芽防于幾先姦謀自破今陛
下聖德日躋神機天挺燭知萬事之統坐照四夷之情廟堂之上

俊又大臣皆有文武全略通知三路利害者豈臣愚瞽標聞所能
究知然而負薪之語有益廊廟况預聞政事稔知邊患敢默而去
乎欲乞令中書樞密院檢取前後臣僚上言章奏相度可否施行
辭免尚書禮部侍郎劄子

臣近蒙聖恩不次遷秩傳聞之始隕越于下尋具劄子懇叩乞行
追寢而高邈之聽未照卑凡樸訥之辭不蒙開允今早亦嘗面奏
親奉德音仍遣中人奉宣宸旨促令祇受押赴告謝以聖慈堅重
天語丁寧不敢有違尋已授訖然而公議可畏私懷未安須至縷
陳重煩聽覽伏惟仁宗皇帝以仁聖至德臨蒞天下四十載東宮
虛位大本未立知陛下有聖賢之量建爲皇子付託大器天人之
望宅心有所四海之命始有攸屬一旦入纘聖統中外晏如厥初
大憂感慕聖體雖小有虧和而神靈護持終獲勿藥之喜是祖宗
基德之厚仁宗知聖之深在于羣臣何力之有豈敢貪天之功橫
受寵命自省甚熟眾議謂何況臣衰殘無所云補未能引退已負

兢慚儻竊崇恩更尸厚祿必招譏議恐致咎殃伏望睿慈深亮愚
悃追停渥命庶安危抱取進止

狀
舉臺官狀

准敕限十日內于外任太常博士以上曾歷一任通判成資以上
或歷通判一年以上堪充三院御史保舉兩人聞奏如三丞內有
合該磨勘者亦許保舉仍須自來別無賊濫忠厚淳直通世務明
治體之人如朝廷選擢任用之後所舉人犯入己賊竝當同罪其
餘賊私及不如舉狀亦當連坐者一員某處任官用黃貼一員某
處任官前右謹具如前臣伏見上件官等竝是直諒多聞堅正有
守資于風識濟以文采堪充三院御史臣今保舉如朝廷選擢任
用之後犯入己賊并其餘賊私及不如舉狀竝依所授敕命指揮
甘當同罪連坐謹具狀奏聞伏候敕旨
乞楊開充大理少卿狀

臣等伏見國子博士楊開材資敏通檢履端約深達時務尤長法
律先曾刪修銓司敕條至今行用稱爲允當昨日知絳州服除赴
闕審官三班院見各奏辟刪修本司條貫觀其議法詳平正而有
守臣等今保舉堪充權大理少卿公事如經朝廷擢用後犯正入
己賊及不如舉狀竝甘同罪取進止

兼侍讀學士舉官自代狀

臣伏蒙聖慈除臣兼侍讀準敕合舉官自代者竊見尚書戶部郎
中直史館張瓌博通古今練達典故有國僑博物胥臣多聞可以
進讀羣書入奉大對臺閣久次朝廷具知若以代臣允協公議
論增經術取士額狀

臣等竊以六經傳先王之道教化根本舊制試進士止以詩賦策
論簡拔才俊其實少有專門名學之人諸科雖能誦記章句復又
不通大義施于有政則又面牆所以前後論取士者常以此科爲
言景祐制書節文始令禮部貢院舉人通三經以上進士諸科過

落外許自陳嘗于某處講授某經貢院別試經義十道直取聖賢
意義解釋對答或以詩書引證不須全具注疏以六通爲合格講
誦精通具名聞奏乞差學官或御試覆試得中具對義粗通取旨
此則聖朝扶進經術漸復兩漢射策之舉也慶曆六年應詔者四
十人合格者八人進士諸科各四人皇祐元年應詔者八十二人
合格者七人進士五人諸科二人今年投牒進士七十七人諸科
五十人凡一百二十七人比之嚮來數目倍多豈非詔書開勸使
然而利祿誘導之至也條制每科不得過五人比再經覆試又須
通落獎進之路似未開廣恐學者稍怠懈美業中止臣等欲望聖
慈稍增人數以勸來者四方聞朝廷參用此科取士莫不靡然向
風潛心經術則彬彬之舉兼成于前代矣臣等見精加攷試須至
具狀奏聞伏候敕旨

代中書密院傳法院罷堂奏狀
臣等伏蒙聖慈以傳法院譯乾元節新經罷堂就本院特賜臣等

御筵者千載挺生屬感符而毓聖五天駕說慶緡貝以成書仰契
真乘永延壽曆方善寶函之目將升緜几之觀梵教旁流增演觀
花之義宴慈申錫更均在藻之仁臣等叨預鼎司竝游譯館祝後
天之洪祉參問佛之勝因彌愧空疏薦霑膏腴

奉使北朝先狀五道

備完使傳取道治封趨賓館以無階辱珍函而猥及瞻言勤意但
切感懷

夙馳星馭已講于慶儀復次樂都遽承于染翰卽披光範深愜鄙
懷

叨備使華已通邦好載馳輶傳俯屆藩垣遽辱緘滕但深銘鏤
將命宸庭修聘鄰壤征軺夙駕將次于會都賓館爲容卽瞻于台
座豫爲歡忭曷罄言陳

參聯華隰修講鄰歡飾輶傳以載脂將臨于會府望門牆而延脰
卽覘于台儀豫此欣愉實爲榮幸

信書將命恭修邦聘之儀行傳戒塗適次都城之壤辱榮函而俯
及荷謙德以彌冲卽詣賓階豫歡私悃

議

代中書詔定大樂名議

宋史定大安樂名在皇祐三年禮臣王堯臣等上其議

准今年二月二十三日敕准今月二十一日詔敕中書門下朕聞
至樂之大統和天人奮雷先聞萬物蠢若聖人觀象于豫以崇薦
配百代之興咸有制作眇觀載籍旁采緯牒詠功象德率著號榮
若顓鬻題根英之文陶虞紀明紹之美三王殊憲稱謂炳焉降及
後世鮮克遵尚惟東漢命以大予開元自云唐樂雖距古未遠而
雅于言道希風咸夏朕所慕焉故前詔執事訪圖博采將以立度
出均攷音正律謹權審量備器協舞以定本朝之述作用彰祖考
之謨烈夫名生于義義出乎實名正言順然後事成而禮樂興焉
庶幾光輝永昇來裔其令兩制及禮官參稽典制議定國朝大樂
名中書門下審加詳閱稱朕意焉故茲詔示想宜知悉臣等謹議

曰臣等賤懵不足以明國朝大樂竊尋前志探觀往古受命而帝
聖功告成守文之君治道大備濟斯民于富厚流至化于洽平鮮
不攷合中聲序正雅樂效法功德章明祖宗宣之于鐘石管絃著
之于干戚羽籥乃復揣稱治象形容德美度曲以颺其義立名以
統其實崇薦郊廟允諧神人感召至和以降嘉生咸池而還作者
代有韶夏大濩從來尚矣允屬熙盛詎宜曠闕伏惟太祖皇帝謀
武而聖大度且仁變伐拯于橫流揖讓馭于歸運平殄僭閏埽除
荒屯天地號爲重開區夏繫其再造一戎底定萬世以基太宗皇
帝以聖域優入之姿膺神器傳歸之重協承駿烈紹敏武功越人
奉圖以歸忠參墟銜璧而服罪正朔所隔亦旣來同文告是加無
思不服廣英材之教育盛王官之辯論審克邦憲祖尚人文俗阜
刑清官修政舉太平之盛于斯經啟真宗皇帝體全上睿道合至
真昭前之光明而濟之以文采化下以清淨而納之于忠厚謹任
吏之法嚴取士之規爲官擇人程才濟物規安億姓撫和諸戎荒

服遂要于衣裳老人不識于金革符命紹至封禪勒成咸秩上下之神垂矜大小之獄倉廩充實囹圄空虛炳焉聲明絕于稱謂伏惟皇帝陛下欽明燭治仁厚好生躬至德而若虛求昌言而如渴懷柔異俗休息邊氓繼好躡林納附河外簫勺羣慝弓矢載囊屏戈獵之娛稀囿游之幸升世室之配侑同戚藩之榮樂刑書用其中典民賦從于薄斂積四聖之致治逮百年之勝殘山川鬼神亦莫不靈蜾魚麋卵皆有常禁海內蒙德薰蒸太和丁斯時也樂典未章號榮不立此有司之失弗能究宣陛下開至明發深詔敷求識微之士逮及承學之列求端中黍造始黃鍾攷律和聲稽器定制五音六舞各得其準習隸樂府以章三聖之功德莫盛焉臣等申被詔書參定明義謹按太常天地宗廟四時祠祀樂章凡若干首以安名曲尋其義也豈非本道德政教嘉靖之美亦沿神靈祖考安樂之故名既素定義足欽承詩美率由舊章記稱孝莫善于繼志書言惠莫大于安人臣等議上國朝之樂宜名曰大安乞宣

付中書門下審加詳閱謹議

代中書密院覆議大樂名狀

功成而樂作治定而禮興百王之隆道雖同貫六代之盛樂皆殊名示沿革之匪常明制作之道出移風俗而美教化薦上帝而配祖考以成功而告神明非甚盛德孰能預于此往者唐失根統倒持罇柄蕩無維御遂至陵遲日尋戈兵時悼塗炭九土分裂于下三光錯繆于上鬼神失其常祀天地發于殺機甲子一周閏位五姓天而既棄唐德且厭華亂故駿命集于我宋伏惟太祖皇帝英武挺出曆數攸歸屬天道之與能膺神宗之內禪懲艾僭暴顧嗟溺喪奮耀霆斷龔行電討芟除不義勤恤有生經啓人倫靖一天宇兵賦悉還于公上權綱不假于近習除吏歸于尺一立法約于三章尊本京師維制方夏陶甄獨運禮樂自出全安諸國之後崇立百神之祀象緯宣精人神享德規模宏遠基圖篤厚開濟萬世卓無與倫太宗皇帝天人宅衷謳歌在聖嗣膺神寶續立武功薄

伐晉人遂夷并壘提封畢入象譯具通敦先儒雅之風周咨政道
之要時文載郁俊民用章置讞刑之官建藏書之策講求世務矜
恤民隱賦斂蠲其重法更徭著于輕科黎庶安生刑罰幾措真宗
皇帝纘戎二后神睿昭通率由民彝躬行儉約勤勞機政之總慎
重刑賞之施選舉廉能賓興俊茂右文崇術劭農恤刑德讓興行
吏治循厚深恤民之愛講和戎之利戈革弗用疆陲底寧瑞命宣
臻頌聲翕作始奉符而行事乃昭姓而刻號諸神受記羣望咸秩
炳焉之美同風三代皇帝陛下體茲上聖迪惟前憲臨下崇于含
垢在宥本乎好生博愛無私甚德而度紹修戎好銷戢武蠶事郊
廟以肅祇撫宗藩而敦睦肅若舊典祠于明堂升侑尊先汎澤勞
下積累聖之忠厚滲生民之骨髓物罔微而不遂澤靡遐而弗臻
上下相安表裏說穆思欲播祖宗之洪烈揚雅頌之正聲光施尊
名章示後嗣同符韶武常爲稱首故深詔執事博延識微乃者造
計秒忽攷聲立均通鍾律之和正干羽之綴申命近列制名大樂

俾援典禮參加詳實臣等欽惟藝祖之戡暴亂也安天下之未安
其功大二宗之致太平也安天下之旣安其德盛陛下之承聖業
也安祖宗之已安其仁厚又享祀時至神靈嘉樂故郊廟樂章大
率以安名曲臣等以謂國朝大樂請如兩制及禮官所議名之曰
大安

文恭集卷八

文恭集卷九

表

中書賀南郊祥瑞表

報本申虔奉符展窠天心顧享福應宣章瞻列象之殊尤浹羣心而聳林中伏惟皇帝陛下德兼魏煥運格清寧敦慈寶以庇民握道樞而裁化念大事之在祀逸典竝修本至誠以感神精心弗匱比者因天心之紀至就陽位而卜郊惟洛櫃之祕文乃霄晨之不貺戒嚴法衛茂對鴻靈爰自翼室齋居清場宿設躬致芬馨之薦允迪純嘏之祥十輝昭融延和于北陸五雲絢藻垂蔭于宸中旋整駕于殊庭用致恭于眞祖圓靈載廓素魄徐升聿昭三善之猷迴發重輪之彩諒皇穹之鑒佑著睿感之敷聞胥契亨辰茲爲至瑞臣等幸陪禋祀預覲嘉徵慶躍之誠倍異倫品伏望宣付史館以播英聲

代中書樞密院賀司天臺奏壽星見表

臣某等言伏覩司天監奏丙位上占見壽星出見光明潤澤謹按景祐乾象新書占曰老人一星在弧矢南一名南極主帝王福壽者月旅陽中星昭丙次前告壽星之兆迴含明潤之輝凡遇亨嘉同歡瑞福中伏惟皇帝陛下廣淵成聖疊穆居尊恭己當陽順大中之五事撫辰育物協通政之四時裁成七政之和嚮用九疇之福先青祇之中候見南極之上躔彌紫宙以收氛臨黃衢而汎彩老人垂象俾下土之觀文太史獻占慶後天之應壽有光聖日增煥祥編臣忝冒近司預聞嘉應奉億年之瑞貺均萬宇之歡心永保無疆光昭不朽

代賀立后表

臣妾言恭以紹興大寶崇建長秋凡在幅員孰不欣抃伏惟皇太后殿下慶鍾沙麓光協壽房蘊四德以兼徽契于齡而偶聖玉衣之夢素協于奇祥金穴之華早膺于妙選屬大橫之纘服奉禴翟以正名抑有典常允歸謠頌永正軒龍之體長扶璇極之尊與乾

同休配坤惟厚臣妾無任歡呼屏營之至
賀奉安三聖御容表

臣某言伏聞南京鴻慶宮成奉安三聖御容禮畢者繼啟新宮續成先志鼓鐘所落鳧藻相歡臣竊以別寢之興蓋尊王業原廟之設實廣孝思稽克構于聖功兼表崇于文教光昭宗祏慶洽天人伏惟皇帝陛下凝監太清紹休聖緒觀文闡化握河洛之坤珍受命宅中都房心之星次惟藝祖肇基之地經先皇駐蹕之巡特創琳宮阜安鼎邑殊庭中廢宸慮載凝濬發德音勃興寶構森倚萬楹之盛仰延三后之靈孝子求神固非一處先王不寐迺懷二人奉漢寢之游冠尊軒臺之晬表龍舟夙發羽葆親臨申命禁林之臣奉寧法物之駕神明氣象胥接二京之間朝野頌聲共歡千載之際臣遠守郡土久去國門方童觀之時阻窺朝美興壤謳之俗竝樂時康

代僕射寇相讓恩第一表

絲綸誕告有命自天冰炭交懷跼身無地中竊以宰弼之職政本
是毗寅亮天工翊宣人紀上以應泰階之耀下以副巖石之瞻當
一人注意之求處百度仰承之地是故明詢于眾昆命爾龜周建
公穰不敢必備官之制漢虛相府用以待遠方之賢蓋倚任之絕
崇在授受而斯允如臣者本惟常品素昧遠圖幸以遭遇先期忝
塵邇列偶繼協華之旦彌敦敘舊之私爰立巖廊對掌衡軸邁哉
干之在運獲覩承平慙借箸之無謀蔑伸毗贊內惟孤直終荷保
全矧又總職樞庭聯榮鼎坐奉循成憲欽率乃司齟齬無稱容容
茲愧猶復授以元戎之旌纛佩以丞相之印章節制十連董齊千
乘離宮司鑰仍膺冊畢之恩專闔剖符更委含岐之壤名數增盛
眷顧有加實儒素之極榮豈生平之所望自知甚熟享大爲憂惟
恪守于攸箴亦絕聞于報政宴安厚味荏苒流暉企員闕之百常
居懷就日奉細書之一札但謹宣風比者聖詔遐臨皇慈俯被曲
承持節之召俾展執圭之儀獲面威顏深諧志願豈謂遽頒恩制

復委台司貳西臺內史之崇升天官常伯之貴明敷有著峻舉徽
章聽命以還撫膺自失蓋念臣久叨重位過沐鴻私論報無階踰
涯旣甚種種之髮復因病而得衰諄諄之心彌畏滿而招損敢復
昧進重增其尤豈可再以樗材玷于柄用非止尸官充位瀆乃朝
彝固當速戾傷年戕其生理實貪生于盛世須瀝懇于露章伏望
皇帝陛下垂諒愚驚見矜憫款念隆器之無假寢茂渥于已行別
擇良能寘諸丞弼如此則微臣保量力之訓庶道人言公朝得授
方之規無傷國體傾祈至切戰悸無從

第二表

伏蒙聖慈以臣陳讓恩命特降批答不允者怔營之懇虔仰于至
聰溫密之言曲形于優諭捧讀惶灼罔知所裁中竊以讓爵于朝
前經之垂訓假人以器往聖之攸箴矧惟台宰之崇實居衡軸之
地儻茲虛授曷允具瞻如臣者識昧遠猷材惟常品獲邁亨嘉之
會濫塵顯重之資被眷兩朝承榮四近踐陰陽調變之任莫代天

工贊夙夜宥密之謀無裨晝訪充位之譏攸集嚮明之願彌敦乃
至投鉞齋壇建牙戎翰厠星階之著象仍玷台儀剖麟契以長人
蔑揚闡政洊易鑽榆之序載深存闕之誠一節以趨猥承于君召
介圭入覲方覲于帝暉豈謂皇帝陛下靡間疏庸曲推圖任特頒
揚庭之命再升調鼎之司貳八柄于西臺冠六卿于會府洪惟真
館欽奉仙宗式峻使名用優寵數聆深辭之誕告撫疲質以載懷
神福于謙實害盈之可畏民惡其上且致寇以是虞爰瀝丹心仰
通尺奏未動穹昊之聽益增冰谷之憂須更露于由衷冀必回于
渙汗伏望皇帝陛下念僥榮之太甚察量力之不遑申飭攸司亟
停前詔庶使廟堂重位免貽不稱之羞犬馬微軀更荷曲全之惠
代宋狀元謝及第表宋庠及第在天聖二年宿卽是榜進士
太常試藝謬參籍奏之榮法坐第名濫塞言揚之選沐清光之下
濟仰華旦之親逢祇荷寵靈伏增欣懼謝中竊以羣材博舉鴻化肇
先慎簡乃僚紀歷代之寶訓譽髦斯士垂大雅之美談克樹泰寧

之基允爲盛德之集若乃右賢撫運左籥隆文率由上聖之姿規
恢前帝之憲伏惟皇太后淵猷冠古景鏤在躬軒曜儲靈有成湯
之骨法坤儀納順茂太妣之音徽鋪昭正始之風述宣中壺之化
而自鴻階紹建寶統嗣興授玉几之顧遺財成樞務總金聲之條
貫登翊聖眞率循豐茂之規迄用緝熙之典故得九清乃睠萬寶
由庚諸福之物竝臻至治之隆胥洽靖共庶位招致羣廉舉師俊
之彝章下發中之溫詔旌賁之命相望于巖中物色之求駢臻于
闕下申飭辨材之制謹嚴飲墨之規輟邦直于中司簡朝英于上
笏光昭盛節委重斯文如臣等涉獵有年削摩無狀士鄉充賦偶
承乏于計偕英毅須才固絕希于聖選撫空疏而增惕備程品以
奚堪豈謂宸造曲成睿思狎至褐衣賜對扃帝宇之凝嚴睿藻躬
臨竦天姿之溫穆薦登茂級獲寘榮塗錫再命之身章曳屣有煥
頒十行之言紵雅奧增華席鴻霈以寢深委賤質而奚報臣等敢
不慎修履素惕奉紳書慕漢吏之惟良副堯心之在宥恪居官次

益敦宿業之方懷畏簡書彌勵夕冰之節少酬覆露共誓捐糜
湖州到任表

空乏之才坐塵于冊府輕凡之質驟忝于列城郡望間華朝恩光
泰尸承在始隕越無從酬伏念臣奮自孤生略無異操偶階末技
始籍中銓曾大以來門業不振平素所望器分有涯叨于誤知會
其乏使拔從凡品寘之道山太平養棟之庭茂彥發硯之所名臣
輩出卿幹森呈而臣風識素淪藝文特譴納汙在上竊吹其中抱
槩十年無裨至治挈瓶一介有玷大猷頃從舟乘之還嘗奉銓曹
之領番休延閣之直趨走赤墀之塗亦在序之通階有宿官之緒
業非不知書筵暇豫臺職優崇相與淵雲之徒樂道堯舜之事而
臣母老垂白人意戀生不勝懷土之情遂有祈天之奏乞從間郡
自效薄軀展其烏鳥之心慰彼寒泉之思伏蒙皇帝陛下賜恢仁
覆推廣孝心不違之顏煥生于咫尺日俞之命驟霈于穆清輟七
閩之遠藩授三吳之近地俯鄰州曲介在江湖風土平調道塗夷

近得以行過廬冢奉侍版輿人子至榮紆蒙少輩君親大義論報
末階臣已于今月二十三日赴上訖初宣臺劄稍見城黎諭聖心
在宥之仁視雅俗如傷之意而茲土差沃去歲汜康比及春來頗
有飢者未到任前通判虞部員外郎劉璫奉若勤恤虔于救存廣
施振業之方幸無流亡之患今夏蠶既多縷麥亦有秋諒開豐懋
之占深洽熙平之化戴盆之下胥燭于天光鑿井之餘同均于帝
力而臣下車甫始去國迢遙孤于外官不勤金革之習任以煩事
又爽宮臺之能獲守偏方預班寬詔勉圖拙者之效庶逃候人之
譏惟竭愚衷以對靈施

蘇州到任表

江海腐生本惟一介東南守將併忝二藩循幸已多祇榮惟懼竊
念臣在器凡近于才樸疏起自後門奮從末技清閒之始天毅賜
收空乏之間書林見育幸預遊于時雋得仰齒于朝闈行避蹊邪
志希樹立終寡適時之用曷殫當世之宜亦嘗出領倅車再懷守

文身
紱竭一心而營職展四體以從公幸奉官箴不累刑史而門戶多
難年志早衰入麗正以校書忽踰五閤任奉常之博士凡涉七霜
去歲甫畢喪期僅存皮相間關歸國黽勉服官會收累稔之勞且
旌羣吏之治太微郎位獲登一臺司會計官比更兩局有尸廩稍
之人無裨泉賦之贏然而職業優游保無玷缺朝廷寬大足養資
名清光在瞻榮塗可企但以亡親朽骨久滯橫塗微臣禱骸常憂
先露幸中吳之闕守復故里之與鄰因瀝血誠仰干宸聽伏蒙皇
帝陛下大恢仁憫深照丹愚濬發天慈下從人欲藩城之任既席
厚恩臺觀之名尚塵前職違離都輦訪問路歧自淮以南雨水時
若維夏之際蠶麥善收便道過家去月至郡井絡繁庶土物清佳
款太伯之遺祠高風如在望闔閭之故里喬木猶存廨舍凝虛俸
入優腆茲獲寧于血屬前足治于親喪秋毫之微皆出帝力夕冰
之操彌厲臣心敢不肅奉詔書慎司刑典更徭之役務恤下貧輿
賦之期用勤公上勉圖薄效用答至恩

兩浙運使謝上表

祇荷詔除就承使乏用過本量恩越常均忖己無堪銘襟增悸謝
竊念臣才能有限資名素輕直由腐生端遇聖日因乃末技玷冒
周行升預書筵無訂正之益進參計局乏鈎校之勤絕補事經空
尸廩稍加以不天邁閔蚤歲喪親至使遺骸久在橫壤常憂先露
貽累後見幸蒙曲慈往俞更郡俯鄰州里之境通治閨門之私申
錫告文聽歸襄事前後十稔內外六喪取資圭田與耐真宅釋犬
馬之負頓覺累輕撫螻蟻之生未知死所況非木石之偶豈嘗邱
山之恩方還本邦復布前誥寬大之意一體上仁簡易之方仰遵
治要庶奉三年之計或收一日之長不圖大恩超使本道就頒臺
札加賜庫錢光照里閭色動車馬厯守二吳之地皆是藩城就宣
一面之風不離鄉部以布衣徒步之賤有畫繡前驅之榮寵既至
而忽驚感且極而興歎何則提封廣斥輿賦繁并持按察之權居
澄清之任方于爲郡之體不可同日而言民隱難于究知官邪資

于發摘游交聯絡于屬郡親戚布滿于故鄉人倫則有義有恩正道則無偏無黨一斷以法人且疾其少恩稍寬以私眾必譏其弛職已行之命不可免至愚之資何以勝任重才疏功微賞泰此蓋伏遇皇帝陛下天光均燭雲澤就施罔遺孤外之臣謂可東南之使大君有命而見用雖出誤知小臣操心之甚危敢忘圖報誓將灰隕以答寵靈

代趙漕謝轉運副使表

忽奉中俞備使外計人共駭其非據臣亦慙于罔功臣猥以謏才濫膺煩使一持使節三易歲華以其承命之勤委以救荒之政凡捐除租賦使無追呼之擾與振發食廩以消流亡之憂皆聖訓之所裁顧臣勞之安有方自陳于疲繭庶少竊于安閒成命再加初心有愧況臣孤根難植小器易殫自顧缺然無左右游談之助其誰致此盡聖神特達之知恩大難酬感深以泣恭惟堯仁宅下舜智察倫謂著在三尺之文莫非寬大故差擇百城之寄要在廉平

不維迂儒亦玷華選臣敢不祇承德意遵奉詔條期在富民敢較米鹽之細謹于律下誓懷冰檠之清

改左司郎中表

考課四期增秩二等寵光洊集榮懼交懷中竊念迹本單平性惟介拙起于凡品之末邁此聖圖之亨猥用微才遂叨非據內廷視草蓋出于誤知左掖握蘭亦緣于虛授仍尸史局兼侍經帷久玷高華日重大官之費三蒙宣召晚躋浴殿之深榮遇罕階忠誠自信上不欺于仁聖內無愧于神靈然而才匪患多學惟寡要徒軋抽于制命莫宣暢于神規以至審克刑章講修牧政皆上資于聖斷徒謹守于詔文無所建明有慙曠素加以方愚向國孤遠立朝本無左右之容不為朋黨之計貴游可憚近習罕親常憂三至之言有感四聰之聽方虞幽黜敢冀寵遷豈謂記錄年勤推行恩典進左行之首秩沛內史之榮章竊愧負乘益增隕越此蓋伏遇皇帝陛下曲加金度深諒樸疏施及孤臣擢茲顯級敢不勉思深訓

文集九
飭厲薄躬務在守官不敢遺力期仰酬于覆露當永誓于私捐
轉官乞回贈祖父母表

臣某言今月十二日閣門告報蒙恩授臣兵部員外郎依前充職
者超霽崇恩越遷茂秩聳聞成命增悽幽衷懷感之餘無言以寄
中謝臣聞天以監觀而爲德其聽孔卑君以咸感而受人所愛惟溥
矧至仁之御世務廣孝以導民敢率丹愚仰干神睿難寢叫聞之
欲預增惴谷之憂竊念臣地緒本寒人資至劣謬操孤技端遇盛
辰獲躡仕階遄叨從蹕薄才絲力曾裨補之未施厚訓深辭顧演
裁之莫暢日禡禁林之被歲尸長府之錢豈圖誤簡清衷旁稽陟
典愍爲郎之久次特升秩于七兵勞則素愆恩惟加厚當卽虔于
制命然內迫于私誠臣曾大以前不及進官歲時所祭未有名稱
亡祖臣某祖母某氏越在幼蒙卽承誨育早從厚安常慨先慈而
臣邁會亨嘉尸承禁近盡事君之節卽受教于樸忠推本祖之言
忍獨專于榮寵臣欲乞將聖恩欽授兩資官回贈臣亡祖亡祖母

一官一邑號庶伸愚志獲賁幽局伏望皇帝陛下濬發天慈俯從
人欲收曲恩于上閤漏麗澤于重泉魂而有知應當淪骨臣雖不
肖敢忘捐軀

文恭集卷九

文恭集卷十

代中書樞密院陳乞御製明堂樂章表

近奉聖旨令臣等分撰明堂樂章者崇饗之初方修于闕典登歌之首宜冠于彌文敢冒大猷不勝至願竊以明堂謂之世室政教所班大饗寓于郊宮理則未正聖惟善述道乃從隆伏惟皇帝陛下純輯羣元欽修百祀馨香嘉粟以虔郊廟之思祇戒靜專以篤神明之接比承天表之德大擁時邁之休然猶增秩無文益追來孝企總章之嚴配卽太寢以薦誠稽參厥宜著定其當合祛天地參侑祖宗迴臻變禮之方濬出淵衷之慮有司得奉于隆旨若時絕企于清光而又度曲制名納言發德親承沖旨爰命具臣俾牽軋于菲辭將登參于雅奏內循疏拙曷足形容恭聆明詔之音一時增惕深惟盛德之事千載罕逢至于賓延泰尊哀對元聖必資睿律用播樂章乃可以交三靈之歡導百順之祉甘泉故事開元

舊儀咸著歌辭具存篆冊粵若章聖受元符之錫祗答榮號時則
徇弼臣之請親作法曲一十六章近則陛下當景祐之隆聿修祀
典居常因聽政之暇亦製雅歌六十八章隸習奉常流傳樂府以
承上下之祀用膺穹厚之祥乃今五室既嚴九筵是度人祗翹祀
神瞽佗音睿作有先工歌難曠其明堂大饗天地三位及祖宗三
位酌獻樂章欲乞聖慈特從御製用稽前憲俯照下情暫受寶附
載摛睿藻薦功祖考揚德天人俾肅雍來享錫之以難老與猗那
長發摠之于無窮

代中書樞密院乞乾元節用樂第一表

今月二十七日入內都知王守忠等傳宣中書樞密院爲魏國大
長公主薨將來乾元節更不作樂者外館在喪感深于聖性誕辰
廢樂昭發于德音博稽降服之成參酌祝筵之慶輒沿眾欲須冒
主聰伏惟皇帝陛下錫類纘戎寶慈立愛率堯仁而睦族諧舜孝
以導民敦敘成風濟惠和于天屬慎微流化格忠厚于人倫徇齊

蓋本于生知淳至匪由于外獎近者魏國大長公主虧和感疾收
視凝精診淵慮以焦勞形至誠而懇到候問旁午禳禱駿奔特紆
法駕之尊躬展家人之禮泣然流涕親爲舐瞳極周文之小心無
漢后之難色掩前王而特出較至聖而孰能秦臺終迫于上賓沁
水俄從于東逝訃聞屢悼往臨盡哀五日廢朝頻卻大官之膳千
秋邇節預停韶樂之音馳遣近璫諭宣冲旨尋禮官之獻議原主
黨之致哀已除功慘之喪得承吉祭之事既立文之有素于用樂
以無嫌况復華渚誕期綿區至慶相趨萬玉之會大設九賓之朝
重譯所通遠方皆至輯瑞之藩侯陪覲執珍之夷使在廷稱薦萬
年之觴宣覃一日之澤薰颿待奏絳羽侍儀如停金石之音懼缺
天人之望形容盛德本資羽舞之蹈揚感召至和實賴鹿鳴之宴
樂伏望皇帝陛下勉遵彝典稍抑至懷收既往之盡傷順無疆之
祝頌濡然遷慮許一奏于咸英鏗爾發音用參和于夷夏不勝至
願實望曰俞

第二表

功服邁慘誕節卻音嘗貢奏函冀回冲旨比奉批章之答未蒙從
 欲之俞聆命載兢仰高增踴伏惟皇帝陛下孝思天挺睿德日躋
 履陶唐光被之資躬天乙懋昭之美體慈為寶撫邦族以咸和立
 愛自親穆朝風而歸厚近以齊國大長公主前表在末追封日
魏國齊悼深尊屬念積諸姑緬懷賢懿之風增重穆清之感亟傳聖誨申
國異稱救具臣俯當甲觀之誕期趣罷宸軒之奏樂雖天懷之嘉慕有越
 常均而邦典之孔明未違往制非止正期之絕服已經外次之致
 哀比及冥辰累踰旬浹以禮文而取正于樂事而得施自貴主之
 愆和比上賓之復魄乘輿再駕冠蓋相望積齋肝之焦勞虔靈祇
 之請禱理迷與善氣迫歸真淵衷足貫于神明至孝增光于列辟
 況復誕彌之節實居朝慶之先臣工就望以揚休夷夏駿奔而歸
 福安可以闕英莖之薦壽停金石之備儀伏望皇帝陛下勉循至

公少寬寧戚采容臺之上議許樂府之奏音慰天人欣戴之誠副
 臣庶祝延之意惟垂開可以釋翹危

湖州乞為太傅謝安置守冢禁樵采表

春秋之記太上立德其次立功謂之不朽聖人之制能禦大災能
 捍大患則必見祭至于封表閭墓禁止樵蘇尋所來而蹇繁蓋難
 得而疏舉雖聖賢相去事業有間迹其大指所以褒德旌功而已
 竊見晉太傅諡文靖公謝安挺生江表忠存王室甫從衡門未解
 韋帶已積台弼之器便繫蒼黔之心及起東山相簡文帝摧桓溫
 九五之逼破苻堅百萬之眾名蓋當世功濟諸華號文武之偉人
 為風流之稱首張文規所撰吳興錄稱安墓在長城縣南六十五
 里初葬建康之梅山為陳始興王叔陵發其冢裔孫夷吾為長城
 令徙于縣南三鴉岡按長城即今長興縣臣昨受詔除出忝州任
 到官之日遂移本縣訪墳柏所在據大理寺丞知縣事裴大亮狀
 于縣南萬安鄉三鴉岡訪得安冢履地十畝有畸古老相傳謂之

謝墓田路去縣與吳興錄所載略同墓傍社戶十六歲時祭拜舊
有叢祠不堪其陋臣量破公省錢委大亮移置佳處重建祠堂凡
屋十二遣工往塑其像冠服儀衛悉用當時之制然祠墓差僻人
迹罕至若無給復之守恐罹樵牧之患昔信陵濁世之公子漢初
蒙守冢之給介推霸者之陪隸晉復啓環山之封况如安者高德
卓然雖人隔本朝功訖前世穆然清風猶在庶物臣每見郊丘所
肆赦前代忠烈立廟所在莫不申飭長吏嚴加虔奉欲乞聖慈特
降敕旨于安冢旁申禁樵采給復五家以備洒掃守護之役敕州
縣官吏歲時祠祭以明聖朝紀元功褒有德之意臣預頒詔書無
補風化干冒冕旒臣無任祈天俟命激切屏營之至

代中書謝詔書止絕內降表

宸襟燭理明詔宣音杜邪枉之險蹊歸公平之正路欽承睿旨抃
切愚衷謝竊以王道之興必由正直國柄之本實繫賞刑賞信則
內外服焉治功日起罰中則羣下肅若姦慝不生屬在睿明張茲

紀律伏惟皇帝陛下敷施治具總攬政綱有聖主廣被之資恢王
者無私之度信賞必罰濟庶績之熙凝昭德塞違廣百官之臨照
動修前憲率繇至公克守盈成遂底嘉靖然而承平浸久涵養益
深偷薄之俗匪敦進躁之心易動紊公朝而幸進趨私路以祈榮
或蹈匪彝自罹常法規于貸免陰務營求實繁內出之文深瀆至
聰之聽廓然聖斷嫉此澆風以謂制治之元大于一統蠹政之弊
戒在多門因成饗于合宮訖宣恩于層觀申坦明之定制塞流弊
之濫源或許自新庶幾且格實契澄清之理足消貪昧之風臣等
忝備近司親承隆旨雖無才見每誓樸忠敢不仰稟訓言恪謹條
約交相勸勵期在遵行

代中書樞密院謝瑞竹圖表

今月二十二日使至中書蒙恩賜臣瑞竹圖一軸者翠本交枝駢
生于禁園緇圖設色首降于叢霄啓鈿軸以相鮮閱青玕之對聳
圭衡兼映巾衍增榮祇賀恩頒彌驚寵睠謝伏惟皇帝陛下惠孚

動植化洽平成朱草不絕于史書行葦見歌于詩雅生物咸遂本
資始于至仁冲氣爲和乃薦榮于祥植瞻言平圃蔚產修篁擢豐
壤以同根出珍叢而異幹扶疏竝秀知造物之有功託寓致靈表
太平之無象慶昭繇颺瑞等駢柯有穆宸襟興憐妙物降丹輿而
畱覽集華組以臨觀命繪事以傳模敷德音而錫與臣等預瞻秀
拔仍拜章施懼逢旦暮之亨交勛歲寒之守永惟祕奉益切昭銘
代中書謝改官表

宗祀明堂
汎恩改官

臣等言近進劄子以蒙恩改官乞寢成命伏奉今月十三日手書
所讓宜不允者恩推異等事出常均比控丹愚冀收華渙終祕允
俞之旨復形敦諭之音閱琳札之丁寧被絲言之郁穆敷誠莫克
祗寵逾驚誦竊念臣等器非宏通才惟凡近起白士縫衣之賤遭
丕后席圖之隆寢竊時榮遂階弼用處輔佐綱維之任當表率士
臣之先雖夙夜戴君勉竭自公之志而安危在相曷膺注意之求
固以聳曠素之深譏憂負乘之至咎幸遇亶聰至治若古考文復

五室之肇禋廣六天而合祭纂戎率義侑祖及宗齋戒有初已卻
大官之妙饌登降攸恪復虛小次之燕居故得精志通幽正陽升
景重陰屏沴協氣宣和三神鑒德以孚休四海述職而來助汎加
恩澤洽被庶工首從當軸之甄渙發揚廷之告參榮宰路進秩升
宮雖君命之當虔顧人言之可畏矧在具瞻之地敢貪橫施之名
懼校議之或興非家至而能曉嘗首陳于底裏亦面叩于規中祈
寢前恩庶存小亮而螻蟻之懇不能動天葵藿之誠徒知向日猥
頒書詔中諭旨辭謂汗令之已行形袞褒而彌渥承命益增于隕
越循牆但極于凌競此蓋伏遇皇帝陛下樂在均釐醲于覃賞思
蓼蕭之澤及本芻狗之仁深超從進律之遷彌積在梁之刺敢不
欽祗休命永勛忠圖庶有答于曲慈或少逃于清議

謝救設表

伏蒙聖慈以臣入院賜救設者視草充員方躋于坡禁班觴示惠
復敝于詔筵羅方丈之肴羞融膚寸之醪蟻才林盛集橐從畢臻

示恩禮之兼常被光榮而加腆此蓋皇帝陛下嚮儒恢化稽古上
文厚玉殿之祥延深復門之睠遇賜收萬品召置禁局逮涓日以
祇官復需雲而覃渥大官先置宴豆有加闢鼇署之靚深增麟樓
之赫眎寵靈過泰徒醉飽于太平文采勿昭詎章施于盤詰惟圖
勤悴以答褒嘉

辭免翰林侍讀學士表

臣今月初二日閣門授到告敕二道蒙恩除臣翰林侍讀學士者
祇奉褒遷不任驚灼竊以參侍帷幄進讀典文本優名儒兼采時
望如臣者末學膚受一介野生無他異能但逢聖獎謬加書命曷
暢代言近以昏瞳乞補閒郡嘗傾奏懇終寢俞音忽被曲慈擢升
邇列學術淺陋職位高華實匪至愚所可充選况然承命森若負
芒伏乞聖慈歷簡者明改授鴻碩庶安危抱以穆僉言

謝翰林侍讀學士表

冠居綸掖久玷清司參侍經帷驟羣大雅仰祇寵渙伏積兢榮

謝中

竊以入奉便朝進敷往策膺穆清之顧問預禁奧之趨翔無嚴徐
之才不足承于應對有稽馬之學乃可奉于諮詢如臣者性業顛
蒙才資底滯記問為學會莫究于言筌篆刻攻文絕無裨于治具
端逢亨會漸竊榮階歷右史之服官辱西臺之書命當彌文之盛
際獲忝代言乏爾雅之深辭無施潤色久聳濫巾之誚居懷襪被
之虞幸遇皇帝陛下留好藝文垂精道術觀邇英之講勸廣衢室
之訪臨延集諸儒究研羣典豈謂腐生無狀上睿誤知升廁近嚴
預陪進讀陳倚相邱墳之典參張酺帷幄之臣職近地親材朽學
陋將何以助稽古道開益聖聰撫末學以空疏臨多文而眩懵徒
尸禁職莫稱厚恩伏遇皇帝陛下恢闡堯文循持禹律探觀前史
之載昭鑒是圖敷求承學之臣謬延遂及豈茲庸淺足副簡求惟
當采摘善言鋪陳往行庶虔資于一覽期祇慎于官箴

授侍讀學士舉官自代表

右臣蒙恩授侍讀學士準敕令舉官自代者臣伏觀尚書兵部員

外郎天章閣待制兼侍講趙師民學以爲己善不近名道術通明德行純備有多聞直諒之益在正始中和之流久侍講筵兼聯制閣儻甄升于禁職俾進讀于祕書是能滋廣睿聰充副德選謝宣召入院充學士表

臣某言今月六日翰林待詔費瓘至臣所居奉宣聖旨召臣入院充學士者王人俯降天旨就頒召置承明之廬解去邇英之籍寵褒驟至榮戀兼深謝伏以渙號所孚禁林爲重漢家待詔因金馬以名門唐世尚才自鑿坡而移院官貴近而少輩地清祕而罕階深惟視草之難宜得燮萁之敏豈伊蕞陋足玷禁嚴竊念臣材拙且疏器凡而近出自羈單之緒邁于熙盛之辰進忝士科預尸東觀守符再假漕節一持孤于外宮介在東鄙分當文俗之使絕希翰墨之游出而誤知矜其久次沛然降劄召言還臺辱右使之珥彤玷西垣之書詔進裨治體無爾雅之訓辭坐冒職儀乏相賓之名實乃尸朝委兼攝中銓僅遵唱注之規蔑著品題之目遽從綸

省入侍經帷陪諸儒之竝游預羣書之進讀欣屬好文之會舉迷摘句之方訖無忠言裨于上聽方虞襍被之汰遽承出綍之遷召拜北門延升近署申加邇職參莅史闈兼二官之至榮盡一時之清選瑣材極陋寵數踰涯此蓋伏遇皇帝陛下假借用人曲成遂物誤采頑愚之質知無左右之容以其嘗踐掖垣經爲明命直無他技羸有前勞擢于禁輿之司復責演裁之效矧上清之冊府侔方丈之仙山將何以寓直禁中備穆清之訪對誕敷天下約雅奧之代言始承命以若驚終捫心而失措惟當服勤緒業率厲愚衷恪遵四禁之規祗守十思之慎用殫志力以誓粉捐

舉呂溱王洙自代表

臣蒙恩除翰林學士準敕舉自代者臣伏觀起居舍人知制誥知杭州呂溱蔚登首舉綽負宏文尚書工部郎中知制誥充史館修撰兼侍講王洙號稱俊儒通明經術嚮聯詞掖同掌命書灼見猷爲雅欽才望願停茲命回授若人則公議有在時談允穆謹具狀

奏舉自代以聞

代中書謝爲伏日早歸第表

伏日歸休雖存于告令中曦趣下蓋軫于慈襟祇荷寬優交增榮
悚謝伏惟皇帝陛下紹隆炎曆疑監太清茂遂萬物之宜變成四
氣之順因天地長羸之盛化洽乘離屬金火伏藏之初仁深扇暘
降王人于禁奧傳天語之溫淳閔以服勞許之夙退獲遂燕申之
適彌昭曠素之慚

代中書樞密院謝譯經院賜御筵表

節近繞樞方翻文于竺館仁深推食俄示惠于詔筵聿荷需恩彌
慙曲寵謝伏惟皇帝陛下研幾眾妙釋志大猷本上聖之多能繇
中天而稱號混并書軌崇護宗乘重九譯之語言旁開梵學正五
天之文字祖述聲源邁誕節之祝延奉祕經而演潤揚妙音而伊
始資睿算以無疆臣等迹玷近司才疏了義臨眞筌而易暢對豐
豆以攸慚

代中書樞密院傳法院罷堂賜宴表

竺館翻文慶猗蘭之紀節句筵參義譯貝葉以成篇介上聖之元
祺續大雄之慧命雖獻如山之祝未登程石之觀梵夾修書愧棲
毫之乏潤臚傳敞宴驚兼豆之逾豐臣等匪究眞筌空塵譯綴徒
尸承于飫賜彌隕越于愚衷

代中書樞密院謝題明堂御書後書名表

伏奉聖旨許臣等所請于御書明堂之門額後各書其名者于齡
罕值二寶親逢復得請于日俞獲附名于不朽榮兼常等感集幽
衷謝伏惟皇帝陛下炳發彌文紹修宗祀合大神而右饗卽祕寢
以告虔汎灑百金之毫出于聖思冠絕六師之體表厥雲費迴極
奇蹤實昭能事允爲歷代之寶式嚴清廟之藏臣等修輔乏能邁
辰爲幸猥承沖旨獲署珍圖仰欽至聖之眷懷益慶具臣之遭會
相期勸勵圖報睿明

代中書樞密院謝賜御篆明堂飛白明堂之門表

羲畫垂文奎鉤賁采降王人而頒副窺神迹以究奇仰服異恩同
懽榮遇神伏惟皇帝陛下聰文攸縱神睿多能嚮屬九房攷制五
室並侑祖宗之靈大合郊丘之祀紹興能事濬發精衷聖藻裁篇
首發歌于寶鼎宸毫結字復漬墨于金壺揭華榜以相高參飛藿
而並麗選工禁署寓刻祕珉肖鸞龍翔翥之形盡金石昭銘之美
恩頒位之榮及圭衡臣等並邁千齡獲承二寶慙無裨于台宰誓
永屬于昆雲

代謝御筵詩表

靈畢疏恩方啓示慈之宴寶跗叩寂忽傳正始之音竦禹律之鏗
純布堯章之魏煥百拜同歡于幸會諸生絕企于清光靈寵便蕃
營魂隕越神伏惟皇帝陛下紹休丕緒總攬懿綱聖能之材蓋本
于天縱光明之學不待于月將昭大德以建中酌彌文而稽古鶴
書赴隴樂得穀中之英鳳展臨軒親詳天下之士霈隆恩而普洎
豁大度以兼收爰伸晞露之燕胥載錫起風之宸唱訓辭深厚式

玉度以彌堅睿制坦明倬雲漢而竝麗莫究入神之妙益知游聖
之難臣等猥以頑疏邁茲全盛均天之樂九奏已獲聽聞春山之
寶萬金更容緘祕敢不述宣聖憲祇奉洋謨銘在盤盂用謹敷天
之命勒于金石永昭茂世之規

文恭集卷十

文恭集卷十一

表

代中書樞密院謝賜三朝寶字訓鑒圖表

天光燭臨王人降莅神毫映發繪事照陳獲凡目之榮瞻增愚衷

之慶忭謝恭以國家自一戎之燮伐經五代之荒屯文匿采而弗

昭武淫威而未戢太祖皇帝削平多壘式遏橫流中區始混于車

書生民得去于湯火太宗皇帝纂戎以睿右治在文躋俗中和之

隆同風魏煥之盛真宗皇帝靜淵疊穆緝熙光明協于二后之華

粹乃一王之體厥初締構以屬盛盈聖算成功彌文盛德洋洋盡

美蕩蕩難名至于裁決繁機奮耀英斷署鳳毛之尾摛犀管之英

莫不墨寶相輝神鋒迴拔居然鸞鶴之翥蔚有龍虎之威祖宗多

能固天之攸縱聖明善述歷世而彌光伏惟皇帝陛下道德昭前

聰明時憲規恢祖服務廣先猷攷合神書搜羅遺藁奇蹤畢獲顯

跡槩揚畱聖思于勒成命侍臣而類次形于方版之鏤參諸設色

之明序以宸章置之禁坐蓋將訂盤盂之作况几杖之銘式遵燕翼之謀用慎起居之戒茲惟不朽之事以永無疆之休臣叨預宰聯親逢盛際禁嚴趨召已覲寶跗之文祕副辱頒有踰拱璧之賜誓榮藏于衡華永傳奉于昆雲

代中書樞密院謝許御製樂章表

近上表陳乞御製天地祖宗樂章事伏奉批詔所乞宜允者上睿作歌冒適于章請至聰垂聽申答于詔音恭聆曰俞相趨載躍謝伏惟皇帝陛下紹休基緒獨運陶甄修闕典而勃興奉先猷而善述恢張治具皇建極于大中總緝禮文邈同風于魏煥多能攸縱眾志必通天翰載飛妙龍鸞之翔翥宸章有作麗河漢之昭回鑽仰難名範圍莫大屬講儀于宗祀方詠德于我將尚祕淵懷且諭冲旨敕邇臣而咸述衷眾議而匪安以謂紀綱四聲必資于睿律章施萬物當賴于慶雲因露需頭之封竊祈元首之作昭明盛德冠映眾篇太陽回光不遺于微藿秋風發詠許揆于秀蘭告成祖

宗對越穹厚韶盡美矣行觀于來儀禹無間然允彰于致孝天人胥慶策牘相輝臣等竊邁亨嘉無施贊補獲奉批章之答併增度曲之榮

中書乞賜御製表

西清繹志東壁垂文幸諧物覩之榮竊冀恩頒之寵輒茲披露倍極震惶謝伏惟皇帝陛下駿惠在躬宣明宣業總郁彬而成化宅淵靜以凝神堯德始于欽明被于四表湯聖由乎修紀正厥萬邦克念惟勤允恭若厲洪惟元嗣夙茂英徽上庠之典式觀載崇術教內豎之詢弗匱攸踵溫文且復歷探前世之規躬抒有章之作聿申慈訓益懋凝猷而又儲思濩蠖之中研幾繫象之表索至精之理智同于萬殊宣尚要之辭體包于三變金聲迭振緹帙相輝與經義以備陳居爲代寶兼天常而廣布用厚民風而臣等備位黃樞侍觀綈凡珠躔逖仰慚測管以非周瓊蘊悉披慶出圖之期偶竊懷聳抃彌激傾虔恭祈容照之私庶適傳家之願其前御製

伏望聖慈各賜一本所冀洗心祇誦以獲于漱芳清室謹藏永期于承式

中書謝宜赴清景殿觀御書賜宴表

紫闥沖深綈囊充積貴元儲之善訓許下士以恭窺久奉宜游海蒙示惠仰懷殊遇內積至榮黜伏惟皇帝陛下疊穆御邦哲明稽古蘊多能而乃聖臻大定以無爲承手佑之祥奉之虔鞏集累仁之慶俾厥熾昌爰崇建于東闈用固安于大本若乃孝恭天賦敏惠日躋自稟夙成非由外獎而陛下深敦慈勸茂闡良規攷述作之大方垂睿明之諄誨復以章天之御藻藏府之前編聿昭齒學之風竝示賜書之寵載形中旨悉念邇臣趨祕禁之凝嚴侍威顏之咫尺瞻璧日重輪之曜慶偶亨辰踐玉山四徹之塗鋪觀奧典宸辭綺煥仙翰雲飛若龜負以攸傳豈管窺之能測足使上庠崇術更廣于多聞步障題篇遠慙于懿戒矧惟邃宇邈處層霄飛闥連延華題照灼山擬蓬而轉遶池象璧以縈流杳絕世氛曩倖真

境乃閒宴凝神之地蓋齋居味道之庭羣帝下觀百靈潛護居然物外理絕階升猥沐詳延仍容汎覽塵眸乍刮俗骨疑輕恍若夢于鈞天飄如乘于颿駕而又沛風發唱堯酒分甘徵繼屬于良康浹懽愉于酣滑鍾千齡之契遇極三接之便蕃臣等謬忝近司無裨至治荷顧存之尤異申荅效以何階

謝賜衣服鞶轡馬表

伏蒙聖慈以臣授前件職蒙恩賜臣衣一襲金腰帶一條金鍍銀鞶轡馬一匹者祇荷寵榮伏增悚靦竊以輿馬之錫用以飾恩服物之章茲焉旌禮睠言近侍抑著通規惟華光拜職之初均禁林加惠之厚衣頒御府馬出王閑耀韉轡陸離之光被帶環精麗之飾亶屬思文之后稽若前猷寵綏承學之臣昭茲異數自匪博通之選曷膺渥異之恩如臣者謬以瑣才尸于禁掖蒞事積惟煩之誚不學有將落之譏實無補于演裁俄有叨于進讀已玷近嚴之職仍兼賚予之榮乏鄒彥明經之能慚漢臣稽古之力徒成妄施

冒報曲慈

又謝賜衣服鞶轡馬表

復門天近遂獲兼榮二閣神深更容再至仍拜便蕃之賜益深俯
偃之懷竊以車服之章以旌稽古名器之分戒在假人自非閎博
之流莫膺蕃庶之錫如臣者性未入道學不經師語人地則遠孤
論才質而空劣撫草茅之藁質偶值時來參筆橐之禁聯豈繇德
舉已叨官于玉署復增職于金華仍稽加惠之文且厚敷經之眷
延英開閣御府賜衣上駟之馬既閑載華鞶飾裏蹠之金有赫增
耀帶環顧疵賤以奚堪在寵靈而過泰曳婁弗稱彼已為慚誓捐
一介之軀以答九乾之施

謝兼侍讀學士表

命出曲慈恩加舊物邇英之籍絕而復通禁林之聯榮而兼縮省
躬非據承寵若驚謝中竊以訪道觀書聖人之高致執經摘句儒者
之難才自非直諒多聞宏通精識疇顧問參備侍宸如臣者性

質樸疏器能隘薄起一介之白士逢千載之亨期粵自脫巾寢叨
非服遄從右史亟踐西臺蒙甄書詔之勞嘗忝敷經之列才不足
以宣暢明命學不足以開益睿明甫參西序之榮驟被北門之召
一去金華之業寢廢研覃久汙玉堂之居更慚空素固常襍被忽
奉如綸再陪大雅之羣重侍便朝之讀自惟膚淺曷奉討論職思
其憂心焉如灼此蓋伏遇皇帝陛下特回簡照收采方愚許入廁
于眾賢伴嗣修于前職欽惟將聖稟自亶聰羣下莫企于清光分
寸曷裨于淵智敢不申尋緒業溫繹舊聞用磨衰鈍之姿少答高
明之選

乞贈李昭述官賻卹其家表

臣等伏以甄德表行紀功恤逝聖王之仁政也竊見故翰林侍讀
學士尚書右丞李昭述德範純深夙性耆俊行修而才敏氣沖而
節和然以賢公之孫名臣之子奕世濟美弱冠立朝臺閣典章多
所該識中外事任莫不厭服竭盡近職晚侍經幃志慮益恭年力

克壯近緣齋禁嬰疾臥廬過蒙告恩許還私第寢以縣劇遂至隕
喪臣竝叨講讀同籍祕嚴常僚之情實增楚愴愍章之飾輒有控
訴伏望聖慈許依近例優贈昭述一官賻卹其家魂而有知死必
無恨誓將結草陰報漏泉臣等無任祈天俟命之至
辭免端明殿學士翰林學士兼侍讀表

臣今準閣門告報降到告敕各一道蒙恩授臣兼端明殿學士依
舊翰林學士知制誥兼翰林侍讀學士者恩雖特出事本彙征降
命自天處躬無地敢叨妄施須叩至聰竊念臣器質隘疏天資樸
訥以一介之固陋值千載之休明起自腐生羣于大雅寢叨非服
盡出曲慈待對承明之廬進讀邇英之閣徒循持于章句莫開廣
于聰明文翰之司一登于方丈禁嚴之地四對于浴堂每惟介拙
之才久闕翹英之路未能引退敢復僥榮豈謂謬恩申加近職況
寵靈之過泰豈名實之相賓若冒榮章彌速公議伏望皇帝陛下
濬開俞旨追寢命書俾爰極陋之姿得安至當之分免詒謗累更

益過尤惟竭孤忠以酬鴻造

謝兼端明殿學士表

祇膺寵渥伏積兢惶竊念臣性本方愚才非秀特早遇洽平之治
猥塵禁近之司繼忝崇恩益升祕職荷榮名之華疊懷庸品之辱
虛此蓋伏遇皇帝陛下敘進羣才甄揚眾職遂俾至愚之質亦叨
加惠之恩惟當竭頑庶幾圖報

謝授左諫議大夫充樞密副使表

伏奉聖恩授臣左諫議大夫充樞密副使蒙降批荅不允仍斷來
章者丹赤露中願收于妄施穆清在上終祕于俞音承命難逃省
躬愈慙謝中竊念臣性慚機警識匪該通以斷斷之鯁生遘巍巍之
至治謬踐仕版寢竊書林器無可養之姿材非致遠之具太平樂
育廣施成造之恩英俊竝遊最處遠孤之目以膚受之學兼體弱
之文擢在絲庭召置坡禁參邇英之進讀濫端殿之兼華盡出誤
知繼而非服僥榮尸職重遇邱山論功計勞訖無毛髮方懼必行

之黜敢冀非常之恩忽被命書俾陪宥席聞詔而循牆以走撫躬而惴谷如臨矧茲斗樞實本兵柄上贊幄中之畫密籌徼外之情必也敏謀與夫碩望乃堪聖選始允師言今則弗然屬之不肖遽陳危懇仰叩至聰冀寢謬恩別容時傑控祈雖切批諭莫從但俯偃以滋恭懼負乘之致寇此蓋伏遇皇帝陛下至仁博愛大度兼容察其方愚亮茲狷直知中立之寡黨憐左右之無容出自聖心委之機任退省孤臣之分何勝明主之知惟當勸勵忠圖期殫愚筦若虞機括當戒于纖微不出戶庭更遵于慎密庶將盡瘁圖報曲成

謝傳宣入伏早出表

景炎朱火氣匿庚金伏日早歸雖聞著于漢令中曦促下乃特軫于堯仁忽降使璫俯傳天語荷承恩之下暨欽渥旨之曲全謝中伏惟皇帝陛下若古凝猷對時乎化愛溥將之靈命躬博愛之至仁眷乃近司釐茲庶務當炎帝承離之盛矜此服勞推夏王扇暘之

慈扇暘據淮南子是周武王事俾爰夙退去公門之煩溽獲私此殆因借對炎帝故云夏王室之燕申臣等謬以庸虛叨斯密勿竊樂舒長之化彌欽寬大之

私

謝羊酒表

臣某言伏蒙聖慈以臣生日特降詔書賜臣羊酒米麪者王人傳詔天語宣恩捧戴有初兢惶無措謝中竊念臣出于單緒起自孤生曾乏異才本絲白望寢竊禁嚴之職遄叨內密之司半策靡施寸長莫效徒尸稍食重費殮錢加以享大官之珍甘叨內府之賚予夕冰之懼每積于愚心秋毫之微莫非于帝力負乘爲愧幽黜是虞豈圖當辰之尊特記設弧之旦餘牽加賜醪酒俯霑申以粢饗光于圭華此蓋伏遇皇帝陛下睿慈曲施宸照周融未捐曠素之臣特舉匪頒之典誓當殞瘁以答寵嘉

又

伏蒙聖慈以臣生日特降詔書賜臣羊酒米麪者使驛馳臨詔綈

俯降辱彝儀之豐腆加旅物之便蕃拜賜爲榮省躬知幸謝伏念
臣腐生少賤曲士至愚端遇重華之辰進竊內樞之任智謀淺昧
曷陪坐幄之籌廩稍優豐益取伐檀之刺惟名器之踰分虞負乘
之致災式是仲商屬茲誕日設弧感往列鼎念親永惟罔極之恩
重愧無庸之質豈謂伏蒙皇帝陛下慎隆國體加惠近司醴酒餼
羊籩麴豆米併爲異數賚及私庭等乾坤之施愧無以報戴嵩衡
之賜懼不能勝惟堅忠盡之誠少答睿明之施
乞解罷樞密院表

臣某言近以年力衰疲目瞳昏乏乞還機政嘗貢表函勿奉詔批
未俞章請常言加飾聖度兼容葵藿寸心徒知向日螻蟻微志未
能動天有迫愚誠難祇冲眷竊念臣本惟空劣特出單寒自縫掖
之諸生參持橐之近侍章句末學不足以名家篆刻小文何施于
治世徒以樸疏受性孤遠立朝恥朋比之事君愧浮沈之遂俗介
然自信軋者固多誤緣仁廟之知屢奉浴堂之對拔于詞禁置在

機庭未嘗伸幄中之籌不及更闔外之任豈能坐制千里通知四
夷幸賴安平偶容曠素伏惟皇帝陛下入纂聖統肇嗣寶圖優假
舊臣寅恭初政臣每因奏事親奉德音患太平含養之深懲流弊
因循之久垂訪一時之策規恢萬世之模盛德難名清光絕企而
臣少壯之齒已不如人衰薨之年豈能圖國以至聖之主責甚愚
之臣夕惕爲憂任重且殆仍以犬馬齒載鐘漏景侵因陳昧死之
章冀可餘生之逸得從謝事姑遂養痾而璇指未回玉音尚祕彌
荷包荒之德益昭圖舊之仁然而知止足者道家之至言潔去就
者儒生之常分久貪曲寵終速多言伏望皇帝陛下哀矜陋軀保
全孤節俯從私欲俾退仕途別選耆英用參機劇則進退臣節得
休息于筋骸而本末主恩更薰酣于骨髓

笏記

代中書樞密院謝賜飲福大宴笏記

三神歆鬯甫畢于嚴禋百福在壺式均于愷宴敷宸恩而載洽慶

亨會之斯逢伏惟皇帝陛下乘榮居尊宅中建號直房心之華覆
卽太紫之祕庭擬制合宮崇饗上帝三后纂戎而竝侑百神啜食
以在旁聖志幽通靈貺來答旣成祀而昭孝復式燕以示慈縱魚
龍曼衍之觀陳金匏鼙庶之樂邊羞蔡列觴醴旨清在上之威顏
弗違同伸就望助祭之臣工咸在莫不懽康但醉飽于太平益謳
吟于睿聖臣等叨膺宸眷謬備宰司獲上萬年之觴不勝千載之
幸徒尸飫賜莫補大猷

謝兼侍讀笏記

祇膺華寵伏積驚惶竊念臣篆刻攻文膚受爲學居自慚于曲士
進不至于醇儒幸邁盛辰偶緣末技寔升華近稔服禁嚴預裁內
史之書復視北門之草常虞弛職敢覬謬恩忽參進讀之聯彌積
兼榮之愧此蓋伏遇皇帝陛下早矜介拙曲賜甄升惟圖竭盡之
誠以答優殊之眷

中書樞密院謝春宴笏記

臣某等言乘執規之春令爰舉舊章示折俎之天慈式陳廣宴展
湛斯之晞澤慶樂只之逢辰伏惟皇帝陛下順斗頒常對時覃惠
凝睿思于黃屋惟以靖民均凱樂于春臺未嘗在己屬政機之暇
豫因節物之韶妍稽象于需修懽在鎬以謂人神之心洽則天地
之氣和大會雲龍之庭高張金石之樂融天壺之御醴溥洽羣臣
回日角之睟容俯暉萬物恩旣孚于上下禮亦協于冲和臣等忝
列近司欣階幸會邇清光而尤密戴至造以何勝

秋宴笏記

嘉觴備物正得秋而萬寶成法展垂衣居其所而眾星拱粲然盛
觀生于太平此蓋伏遇皇帝陛下鴻慈自天湛恩濟世洽茲德禮
燕及臣工臣等備位何能蒙澤已渥願介萬年之景福共傾三祝
于華封

代中書謝秋宴笏記

西成協曆慶歲物之順蕃廣宴班觴示宸慈之昭錫爰修鎬飲允

洽需恩伏惟皇帝陛下化穆中區仁孚羣品設衢樽而勵物厚鼎
飪以需賢俗阜刑清號網魚之云漏氣調時豫聆銅雀之載鳴華
黍由庚景風通正誘淵衷而載懌宣愷澤以咸周金石具陳纓綬
竝集妙伎高尋于撞木清歌上遏于雲門瞻黼幄之宸暉已慚形
穢聞霓裳之法曲更覺魂驚同歌既醉之篇欣邁寔昌之運臣等
忝司樞席叨侍詔筵愧無云補之能但積屬厭之辱

文恭集卷十一

文恭集卷十二

外制

曾公亮可充史館修撰制

敕夫西臺書詔東觀約史三長所寄二職竝華選諸橐從之賢得
于綸省之老某奕世學史名家通經體行安于粹和器用本乎冲
厚博我道術執經侍于便朝代予語言秉筆贊于書命講聞正論
丕變深辭屬史氏之缺員思世官之服采惟乃踵向歆之美可以
嗣南董之職噫立言不朽書法無隱傳言後世勉濟前人豈不美
歟尚思勉此

宋祁可依前右諫議大夫充史館修撰制

敕具官某國之大典莫尚于策書世有史官實顯于筆削思立言
于不朽用垂法于將來宜屬耆英迺述作以爾學通今古文擅
宗師職可貫于動微才足經于治本曷代言于掖省復定草于禁
林盤誥之風炳于三代訓辭之體厚厥二京歷近輔以政成睠邇

英之籍舊疇咨勸講召復近嚴屬撰次之缺員冀選掄之任職絕
踰雋碩參寄編摩制度文章用煥一時之美才流職業更增二惠
之華有若世官實惟家學尚倚敷經之善勿忘書法之良

王洙可守本官充史館修撰制

敕具官某朕日者祓飭舊章修起宗祀文繁禮縟德厚流光乃訪
雋儒使志盛典思謹合宮之述用垂來世之傳以爾經術深明才
辭典茂居邇英勸講之近參東觀討論之勤博洽多通精明適用
實膺詔書之舉通覽奏篇之登敘次有條勒成得法有煥緝熙之
美用嘉刊述之勞卽太史之書筵正開元之撰職仍侍朕講往踐
乃司

孫抃可依前禮部郎中知制誥充史館修撰判館事制

敕史官尚矣歷代有之述春秋五例之餘顓邦國四方之掌必也
書法使善惡昭于前其次立言用文采表于後惟是撰著之美則
宜俊碩之流具官某篤行直躬高文強學達夷吾治體之要有壺

遂君子之風曩從西臺服在禁署視淮南報賜之草作伯禽封拜
之書行于諸侯豈惟謨訓之厚置諸太史亦繫職業之長加復同
官之僚率取一時之望對執南董之簡遞煥唐虞之文緝熙予猷
往踐乃職

傅惟幾可兵部郎中直史館制

敕具官某專使一面將漕之職修稽最貳期疇庸之典舉有嘉顯
迹匪限常規爰命寵甄式頒異數以爾性度和厚才理幹明早膺
選于峻良常肆勤于內外經術飾事參于儒學之優法令爲師尤
號吏資之敏瞻言南服之地簡求外計之臣圖其練更委以按察
招綏有序控帶得宜狃俗底寧邊氓休息方切仗才之寄宜從增
秩之畱進屬中臺佐夏卿之爲政入聯東觀預太史之修書竝服
華峻之資就示褒優之典尚凝來績勿墜前勞

張昇可集賢殿修撰制

敕進書殿之職褒藩翰之良用旌正人且賞稽古具官某高節特

文集十二
立直躬無徒試之吏文則肅給而無窒任以綱錯則方峻而不回
嚮者有司坐以薄罪迫于連茹委之班條久從外遷頗鬱中議詩
不云乎靖共爾位正直是與爾有直諒多聞之益中立不倚之風
始寵麗正之名別上朱方之計惟是朕意不忘而忠

孫甫可起居舍人制

敕王者言動世有記注雖二史之任差弛而一時之選愈華非得
名流不允清議具官某學精識遠才美行方辯論有餘介特不撓
擢在延閣任之諫垣鯁議讜言未嘗吐茹清規直質不見緇磷屢
易守符再典漕事風政彌舉器望益嘉差用久勞稍遷右史尚倚
將輸之舊就度褒擢之恩

錢彥遠可起居舍人直集賢院知諫院制

敕具官某夫納忠之先莫若箴王闕興治之美無如任諫臣爰推
渥茂之恩用獎正方之士質之公論咸曰職修以爾風識既周才
謨兼劭以富平之德器出太伯之世家紹休前人協比介弟聯對

大策著聞本朝敷奏其言咸有補于世務參試以政復無害于吏
文嘉其行能任以言責議論慷慨退公委蛇獻納既勤旌陟宜及
古史之任參記言動麗正之學領校典文舉用二職之華進增七
諍之重爾其勿念後悔無廢前勞審思諸宜勤補不逮讜言切至
朕罔拂焉

李兌可起居舍人同知諫院制

敕具官某夫有言責者思其忠有官守者修其職保氏之任則主
進諫右司之業則司書法均是二職皆拾遺補過之臣也自非忠
正之士疇勝左右之選以爾莊修有素方介不撓比膺憲屬之選
進處臺端之嚴糾肅朝聯切劘治體間陳得失頗見納用有嘉已
試之效且酬久次之勞寵以記言委之諫職爾其往服休命敷進
苦言深圖薦替之勤勿爲拱默之計周爰補察以竝來忠

陳升之可右司諫制

敕某朕設置諫臣所以箴己闕詢求正論所以廣治道以爾蔚有

文采參以風識更試外服則材彊濟而有餘察視中司則體端直而無撓比奏方幅數進忠言能切劇于事經多鐫拂于時病適會諫員之缺超從憲屬之選往踐厥官亟修乃職至于刑政之得失言動之過差悉意以聞無有所諱

呂溱可右正言制

敕具官某漢儀以諸吏給事于中唐制以兩省供奉于內惟是右垣之選則拾禁闈之遺自匪髦良參濟風議朕未嘗輕以授之以爾神遠而清體重且粹曷繇異等之舉迺置禁林之華參職朱轡再珥彤筆一遷秩于祕局久藏器于高墉介然有常議者爲滯茲用擢汝置之諫聯行圖記載之勞勉思獻替之最

李執中可著作佐郎制

敕具官某國家設攷課之法立準才之品較實有狀陟乃近明進懋以官賞則無濫以爾早中辭策嘗參賓籌間緣保任之章來稱敏濟之用使幹茗局參預縣章質其滿歲之勞合于班賞之格京

司進秩書省爲清俾升刊著之華無廢操修之素

呂誨可著作佐郎制

敕某昔爾大父相太宗真宗厥功茂焉惟時穆若以爾有裔孫之裕策雋科之秀率循士範參試吏文任宰字而有勞歷終更而無缺監司薦狀鉤覆應條擢佐修書之筵且光名相之闕圖濟前美滋勉來勤

向安可著作佐郎制

敕某本縫衣之流預入穀之選早服名教之樂亦尚文辭之爲幕府參謀首在公匪懈之敏藩房授道有惠訓不倦之勤覽太宗之上言合公車之眾奏在勞可紀于法得遷俾領著于祕邱尚竭誠于親邸

高師說可著作佐郎制

敕某朕以吏員實繁治迹難究故設保任之法委諸按察之官既得公車之章復經選部之覆審若薦狀差以恩遷以爾用軍從事

之秩辟在幕府時則留司乃吾舊相薦爾沈密有守強幹克舉一德之重可以取信故特命引對不與他事比擢任京局領佐史筵往慎爾修以永來譽

宋敏修可著作佐郎制

敕某著局有佐隸修書之任故事到職作名臣之傳非擇才者疇稱官美爾之先正歷居史任爲一時之宗匠成兩朝之典冊不朽之立厥功茂焉爾承前人能世家學二惠競爽見推于時來質歲成兼優最日差用陟典擢預史筵往知朝恩取大門業

張演可著作佐郎制

敕某選部之條黜陟有序清能見拔滯淹者振器乃無廢才則弗遺以爾少有俊名早中科選家世高于閩錄閱滯于中銓浩然之氣老而彌壯曷隨越絕之檄預參賓幕之籌薦任交章終更無缺擢佐史筵之著尚繁文繹之餘虔我茂恩勉而甘節
路保衡蕭汝礪竝可著作佐郎制

敕某等國家以治世之典宜崇寬簡故廷尉之屬必選仁平爾等階升俊科兼練法學比參府畫亦總縣條徇公不私以文無害被所知之章薦閱已試之案文悉通爰書且有比例對遷列署之秩竝居詳讞之曹勉思盡心以稱朕意

張子方萬禎竝可著作佐郎制

敕某等曩繇賓興早擢科等比會都銓之集屢試吏牒之煩咸用節尚之修胥被已知之薦治縣著迹幹局有勞略其往疵攷以今課宜寵祕邱之秩往佐修書之筵勉推精誠務對恩典

范道卿鄭夔金君卿竝可著作佐郎制

敕某等佐著有局本隸修書令名雖存舊職已廢猶曰美秩必用清流爾等體行交修才辭參劭竝繇茂士之選號爲從事之良或賦縣條竝莅局事或因滿課來集都銓直無尤爲多有慰薦旣合攷法仍中賞科命除此官且申吾信切近朝籍益思官箴
周岐可著作佐郎李昭錫可大理寺丞制

文集十一
五
敕某等夫華原濱雍有秦之遺俗故號爲難治趙城近晉染堯之
深迹故稱爲易化爾等端莊有立廉敏自將長治二邑之民操決
一同之政雖劇易殊貫而功次略同復有薦任之函合于甄陟之
典以文而進佐祕邱之撰著治經以仕參列卿之丞屬均自清要
往哉慎修

陳亢可著作佐郎邢裕可大理寺丞制

敕某等漢之法有最課而得遷晉之令坐優舉而乃陟國家開薦
任之例委監司之官擢敘則精才否尤辨爾等或用材質之美揚
于王庭或以經藝之優糜我人爵佩縣銅墨爲郡紀綱治有愛利
之風官無逋曠之事需章雜薦選部修聞領著祕邱決平讞寺竝
爲磐陸之漸勿忘風矩之修

周約可著作佐郎郭灝可大理寺丞制

敕某等同升茂士分踐俊科比沿牒以肆勤識治庖之效智樹風
遠邑綰務要津政條以修局事無壅監司之薦應法銓審之較中

科入著祕局進承讞寺竝居美秩咸服茂恩

陸絳可著作佐郎張靖聶堯竝可大理寺丞制

敕某等邑大夫司百里之命郡督郵秉一州之綱二者之任則均
三人行各異以爾絳名有幹局得諸才旄舉將爲多治縣有迹
以爾靖通法家之學以爾堯本經術之明吏資竝深官簿無缺終
更赴集鉤攷應書參丞理官用信吾賞有以自效勿替厥修

何世昌可著作佐郎陸若濟劉寅張齊古竝可大理寺丞制

敕某等嘗升論秀之科亦階任子之法竝濟公路數調銓臺臯臨
權木之酤胥及連敖之掌或絃歌而字邑或書檄而從軍咸能飭
厲廉規敷宣敏力交章入薦計最居高賞格具存陟恩宜沛佐修
書者祕邱之美秩承治讞者列寺之要官榮序有開班朝孔邇勉
固後凋之節以期遠至之塗

宋垂範可著作佐郎王堯臣杜松張知常竝可大理寺丞王景華
可衛尉寺丞制

敕某等大選之法六歲坐優舉乃得從有司鈎攷便坐臨覆隨其功狀陟之京司故才弗及遺而器無滯用爾等或廉茂進官或高華取資從政郡邑之間服勞事局之次治有最日課應陟書覽薦贖則居多視素履則無缺祕邱領著列寺爲丞竝日美遷尚期來效

吳英可著作佐郎陳世卿可衛尉寺丞楊希古沈紳孫祖慶竝可

大理寺丞制

敕某等或預揚庭之選或藉高門之資同入銓流分幹吏治參畫著敏撫字有勞善句邑版之稽能盡地力之教外則大使之薦雜之最迹內則選部之覆審如計文終更若茲褒勸宜爾入領史官之佐往服廷尉之丞進參衛屯胥列京局宜慎榮塗之漸勿令素履之渝念報己知當虔吾訓

孫諮可著作佐郎王師旦王震朱彭竝可大理寺丞夏侯維可衛尉寺丞制

敕國家著定攷法差進銓流壹責監司之官參稽保任之法省審旣正遷陟乃宜以爾等或州舉升科或世資補吏除軍從事爲郡決曹領算商車典臨茗局職修課舉行敏節廉按察之薦條聞鈎校之司覆實書省有佐卿屬置丞竝從臺格之遷益虔朝寵之茂無易而守更效其來

前石州方山縣令王佐可著作佐郎前泗州盱眙縣令吳天常睦州司法參軍前監溫州在城商稅務傅燮竝可大理寺丞制

敕某等久從掾令之職咸有幹廉之稱使者交章攸司覆實言爾最狀甫應遷科朕親御便廷訾相其質可以才使因而敘遷進屬上臺之聯益思良吏之守

王度可太子中允牛知新可著作佐郎張爽可大理寺丞制

敕某等朕欲濟官政之宜究吏人之迹故責在保任而壹于監司爾等或奮藻賓興或治經進宦參被邦侯之選典司都獄之繁行己有方服官無缺薦論狎至鈎校率同差次資名褒進秩序惟承

華之屬通文石之朝典著祕書持平列寺彙征以進胥慎而修勿蹈匪彝益思自效

郭評可太子中舍人李偉可大理寺丞制

敕某春坊允僚比東臺之封駁秋卿丞屬佐廷尉之讞疑或顛用才流或參選吏幹以爾等修辭入第預軍從事之招治禮得科厯郡決曹之任外章交薦滿課終更質諸銓條灼有治狀宜寵承華之秩往司李法之書彌勵來勤勿更前守

劉孝忠李允中並可太子中舍人劉炎可殿中丞制

敕某等早階科等之升或緣蔭格而仕積勤官簿升屬法卿分守二邑之氓顛司一局之利條上最目協應陟書宜進承華之僚入丞中盾之省益樹風迹以對寵靈

文恭集卷十二

文恭集卷十三
外制

葛宗古可內殿承制制

敕具官某緒惟將闕班在禁墀出護營兵西遮隴道奉上惟謹率下有方自白年勤實中勞典稍進承于中制尚畱過于外虞勤就朝榮益宣武幹

劉吉可內殿承制制

敕具官某少勵敏資服從煩使積諸勞最班于禁嚴屬觀請老之章求援攷課之法不令遺力亦使寵歸進承中制之聯往服稍遷之渥

劉仁用可內殿承制制

敕具官某嶺服之外窟穴黎庶皆在朕臨覆之下往時小醜亦嘗跳梁山谷勤兵遠戍蓋不可廢爾居警邏之任識拊循之方善遏士兵不擾蠻蜚封略粗定監司來言用旌外勞進承中制爾其務

安遠俗取稱吾恩

王文思可內殿承制制

敕具官某迪知武經擢任軍事參典中涓之謁往制樓煩之衝式
過外虞直無遺力嘉覽帥臣之薦進承制旨之音秩峻殿墀寄深
邊部勉思忠果取稱寵嘉

鄭可度可內殿承制制

敕具官某籍在廷臣名有力局數被乘輅之委靡辭馳隰之勞參
幹事經淹移年序因其齎伐推以陟恩用升近陛之聯且視外朝
之品益圖勤瘁用對寵靈

王知信可內殿承制制

敕某定爲勁兵之處扼北道之衝爾監軍屯歲上官伐拊循控帶
頗適厥宜強敏恪廉復寡尤悔通稽成課參合陟文稍用次遷進
承中制就虔朝渥尚勉武經
凌瑜可內殿承制制

敕某階食德之舊服禁塗之近繼銜使指綽有才資往筦列城之
酤來上宿官之伐歲序勤止迹狀信然敘進內聯參承中制尚繫
幹局之敏勿忘率履之勤

孫惟忠可內殿承制制

敕某籍著殿中班禁嚴之地任居寰內提警邏之兵驅馳累年肅
清所部參舊勤而自列用攷法而當遷宜峻墀塗進承音制尚謹
寇偷之視無失士兵之和

李琦可內殿承制制

敕某朕以春秋之法責于外家以漢氏之恩拜其諸子以爾居然
秀挺資以粹溫服在禁塗之華蔚彰戚畹之令勳疇前課稍進內
聯方之常均猶以未稱宜入承于恩制差用峻其資名往虔儀品
之勞益效風訓之美

陳文壽可內殿承制制

敕某早以修謹預參內侍復以開敏典治劇事近以營禁庭之別

殿奉列聖之睟容主作有勞落成不日宜伸旌陟以寵幹能超承
中制之聯對視外朝之品茲爲異渥尚勵勤成

李評可內殿承制制

敕某夫外戚之地多徇紛華而和文之庭雅尚名教以爾承祖德
之茂習父教之忠不雜貴游克蹈訓行近緣貴主之請稍進禁塗
之聯俾漸邇于威顏益遷承于音制往修勝業以對褒章

李永恭可內殿承制制

敕某天水疆藩西遮隴道羽林積弩分屯勁兵爾出監連營且隸
帥府驛上勞最朝案計書戎政頗修軍法應賞宜自近班之峻入
虔中制之承尚加撫循以對旌陟

夏偁可內殿承制制

敕某秦官謁者典賓贊之儀唐制攷功校宣納之最必辭令之尤
練與容範之交修乃可以進服邇聯通承中旨以爾習知儀式綽
有才資早參上閣之嚴久侍大廷之祕善于音吐恪在詔傳有嘉

素
累稔之勞兼賞寡尤之履稍遷近職敘正美名尚最乃修勿懈于

李繼明可內殿承制制

敕某蔚有世資敏于力局典司中謁領護外屯習辭令而精明治
符籥而肅給積勞累稔大比應條稍遷音制之承尚倚軍和之董
益思訓厲用稱褒優

王懷德可內殿承制制

敕某惟秦中之雄扼隴上之要號曰勁兵之處分領盛秋之防爾
提支兵介在遠壁仍關縣邑之治頗得羌戎之和列上勤庸覆中
攷格宜進承于音制尚就委于屯防無忽稍遷有以自效

麥承信可內殿承制制

敕某河菑衍溢害中國者舊矣爾以力致之敏更材使之煩繕完
疆隄習知水行雖故道未復而別都訖寧畱司以聞勞動當陟進
承中制升視外朝勿廢前勤姑續來效以對我褒遷之寵也

王仲平可內殿承制制

敕某爾以辭令之習典吾謁者之任以戎事之練護乃外兵之屯亦用使材出將王命得專對之體有載馳之勞還露封章前援比例夫賞國之典也舉不越功而忠是圖吾賞何愛中制之選親承音旨有以自效無忽我褒遷之典

劉永可殿中丞制

敕某以膚敏之材資潔慎之性束脩無缺莅任有方加駕倅車關掌列郡協宣臺禮之厚導致海沂之康休有勤庸稽合褒典進丞盾省之祕尚委屏星之嚴雖曰稍遷勿忘欽率

方安石可殿中丞制

敕某國家以大比之法攷庶功之能計勞以遷于賞爲懋以爾濟世德之美習吏資之敏領邑寰內著績官下因歲成以報政按治狀而應書擢升內盾之華班尚寄西畿之劇邑勉條終課取稱茂恩

盧詠可殿中丞朱仲元可大理寺丞制

敕某等進官以經術臨履有操尚或累預諸侯之選直無悔尤或再終百里之更具有功次積勤可尚攷法宜遷超丞盾署之華進備理官之屬用旌勞最亦振滯淹服我茂恩勉而來效

李從善可殿中丞趙沐可太子中舍人制

敕某等承籍世資參服官使比更郡邑之任咸聞節素之修官下政成臺中課集參稽弗謬擢敘是宜用丞盾省之聯兼備儲坊之案益思慎履無忝褒恩

呂湜可殿中丞楊極高良佐竝可太子中舍人制

敕某等或進繇經明或仕以蔭入彙從智效竝用法遷擢丞京司典治刑讞外稽出納之令對宣宰字之條局以幹聞政用勤著參稽成課進懋陟恩優以中盾之聯預于儲禁之案始陪朝拱尚服官箴

王希顏可殿中丞盛行甫可大理寺丞王詢竝可太子中舍人制

敕某等或憑籍蔭格或究研律學參承京局外握縣條服在廉平
訖無玷缺最凡所上鈎校弗疑進升盾省之華擢預儲僚之選竝
班朝著仍寄邑同勉思聿修有以自效

張述任伯傳竝可殿中丞蘇盛項里周竝可太子中舍人制

敕某等或早中臨軒之選或嘗籍舊門之資次補吏員進丞京屬
更試力局則牢盆之利甚饒分宰縣同則鳴絃之政居最參稽來
伐協應陟書對遷盾省之華竝寵儲僚之秩益思自效無廢聿修
周偕臧論道杜濟竝可殿中丞陸暮可著作佐郎制

敕某等以才辭之華升預俊級以力局之敏進列京司臨長遠服
之民賦宣劇邑之譜剗治無壅控帶有勞吏民便焉歲月勞止因
稽齋伐之實竝從進秩之科丞盾省者洵且華佐史觀者蔚然美
咸自修飭勿忝褒嘉

晏詹可殿中丞王登王康王允竝可太子中舍人王獻臣可大理

寺丞制

敕某等或出曲旃之家而才質自美或佩滿籟之諺而術學素優
入踐王官之華參從吏職之試剖盤根而軌解甘藿食以自清驛
上計文臺中攷法稍遷中尚之局進預東禁之僚竝通朝闈亦丞
卿讞咸在修飭勿忝褒升

魚周物王鄰臣竝可殿中丞周端李格竝可太子中舍人崔宗旦
可大理寺丞制

敕某等官合著最臺賞有格汎取三期之效博勸庶工之進爾等
或得諸髦彥或奮自經術曩繇任吏之法擢以讞丞之名簽盛府
之元僚宰象雷之大邑咸著善狀悉上計書鈎攷信然褒進爲允
殿局之尚參掌名物宮僚之貳通受令旨乃自法卿之屬竝爲官
制之華往服茂恩益圖來績

江中行可祕書丞制

敕某惟士之髦奮入英毅用吏之敏擢佐史筵受委別京之曹領
行列掾之職局無逋事歲有成勞攸司以言著格應賞通外朝之

初籍丞本省之清官尚勉爾休往虔吾渥

李恂可祕書丞制

敕某朕選敦樸有道之士授經藩房掌教宗子資承風訓之益嘉聞歲序之勤宜推陟恩且勸循誘以爾策造秀之第服清恪之操淹通經蘊究洽政宜臯圖踐履之勞擢居著撰之局置在諸邸敷訓羣言誨接有方褒遷宜及丞于本省號曰清官勉服朝闈之榮益虔宗屏之訓

華參可祕書丞制

敕某朕用偉人鎮于右屬復諭髦彥之辟以參籌畫之功若時居府有課集臺惟是元僚之賢宜懋攷功之賞以爾馳吳士之望懷東序之資雅有學尚蔚負文采數被諸侯之選亦句中司之稽久隨輩而栖遲能從事而黽勉質成有典覆視應條丞第一流之官任中祕書之職亦緣文翰之故且旌書檄之才勿薄外遊更伫來最

張芻可祕書丞制

敕某朝家官人之制用朞以書代沿閏以質成著爲成科抑存至勸以爾學爲諸己行高于時俊拔有文方雅成範烝自髦士置之經庠參備儒林之官以傳先王之業豈止見善首崇治本亦將厚經行之育收器識之用會誦說之最中攷課之法卽其本省丞以清官有著在庭往踐乃位

程昌言可祕書丞制

敕某夫勸至則官修賞行則吏奮閏成而陟用此物也以爾烝自髦士號稱敏才參于賓籌丞我赤邑幹固畢濟安和弗流擢佐祕邱之員外集熬波之利邑無逋事局有美資州上積勤朝舉遷法自修書之美職進本省之清官有著在庭勿懈于位

張維可祕書丞制

敕某賓興奮藻膚敏牽絲服士規而尤修賦縣條而畢振治成遠服課進有司稽功令以當遷念弦歌之維慎用擢丞于本省仍臨

長于舊封有著在廷勿懈于邑

丁翼可祕書丞制

敕某祕省官清丞爲第一非有才令不以相處今簡拔差異而資望益華以爾用文詞之優兼材質之美出于望胄奮從賓興訪之行能則束脩無缺稽之官簿則勞最有條覆實攸司遷丞本省尚續名家之韻勿替王官之箴

李規何若谷竝可祕書丞制

敕某等夫攷績用人之法驗于已試則效以實著而官乃職修甄賞之科時則不謬爾等以學力之敏前致俊科政績之優入佐書局外更吏治復上歲成審覆信然褒勸宜爾進班文石對丞祕邱就服清聯益懷素履

范中模張執中江楫竝可祕書丞制

敕某等夫治迹連最而朝賞不至則盡力之吏將何勸焉爾等階進造之選有彊濟之材曷程薦任之優參升刊約之局外臨州服

對領縣章計上勤庸稽合勞典卽其本省丞以清官秩則就遷恩惟下究以明急遐外之賞篤勤能之勸也尚進懋爾力勿鄙夷吾民咸慎箴規取稱裒渥

陳藻可祕書丞梁谷可左贊善大夫制

敕某等夏口帶江民俗喜訟天水被塞風謠尚武莅其屬邑尤資健令適有成治爰賦茂恩以爾或進自丞髦或仕以承學竝華史局之選咸佩縣同之章齎伐自陳按書當陟丞清聯于本省躋榮序于東朝竝撫寵甄益勵端操

竇彤王穆竝可祕書丞俞希及可太常寺太祝制

敕某等或以才令之選策于時髦或以諷訓之修育自門子參試以事往服厥官列郡之政修有司之職舉歲勞均著朝賞懋推宜丞本省之清往虔祝筴之告勉而端節服我褒恩

邢夢臣可祕書丞韓公彥徐總竝可光祿寺丞杜子才可太常寺

太祝制

敕某等朕分建庶工參濟羣務謹旌陟之法示開勸之方計勞以升限年爲得以爾等或拔自俊茂或蔭諸高華率用才資雜治邑局所至職辦乃今官成稽參應書差次更秩進丞中祕預屬內卿逮于祝史之聯胥服王官之次咸思自效勿廢聿修

周大象可祕書丞任利有可殿中丞陳之損可右贊善大夫制敕國家制法以檢官成計年而攷吏治勞能者進否劣知勸具官某等或策名以文或籍資而仕竝承風訓之益咸聞節行之修居邑者簡惠而不苛領局者強敏而能力以勞自白在法宜遷進丞祕邱入預盾省逮升僚于東禁竝著籍于外朝往哉欽承務乃修

綜

龔鼎臣可祕書丞張瑤王鎡竝可大理評事陳知常可右贊善大夫制

敕某等國家因堯典之舊采周官之法率用一閩參比百工著爲成規汎存大勸爾等早階文藝之選或資胄緒之華服在縣章恪

居利局書伐來上舉最當遷擢丞祕邱進陟儲案胥及列卿之屬對司理法之平往荷茂恩益圖敏政

敕賜進士及第王九成可試祕校郎制

敕某曩升俊科方在穉齒閱于補吏之格退有待年之期勝冠已登攸司言狀姑試發硯之刃往栖句簿之員慎履在初祗命無怠

文恭集卷十三

文恭集卷十四

外制

王珪可太常丞制

敕具官某策府入遊所以養器用之識計局參領所以試才敏之能績效既聞朝賞宜懋以爾出文儒之舊用才辭之優奮取甲科服在書殿粹和以應于物沈默不流其心紬繹典文多證正之益牢籠征算著鈎校之勤財府無朘民之譏天官按攷課之法應書當陟用例稍遷丞諸樂卿贊我邦禮姑率舊職無廢前勞尚當勉之識其遠者

陳湜可太常丞制

敕某選從茂士初有美名進服朝聯分倅州治自罹廷尉之法解去奉常之官屬吾名臣越在憂服以葭莩之聯戚從草土而控誠且云暗昧之愆兼陳隕穫之狀爲乞養親之祿重違舊德之言特出常均俾還故秩當念推恩之異勉思復缺之難

王昇可太常丞制

敕某早躋俊等寢服朝聯長治劇邑之煩介居左蜀之險節廉既著政敏亦修條上計文覆視官簿勞最甚白襃陟信宜擢丞禮樂之司尚委弦歌之宰益思自效勉續來勤

董某可光祿寺丞制

敕某拾青以經製錦于邑嘗學弊獄能傳爰書因干試于有司俾決平于讞法處文無害麗辭有條廷尉以聞膳丞爲陟抑存前比勿替平反

王泌可光祿寺丞制

敕某登造秀之目補察訪之員莅吾寰畿介在西北密邇萑苻之黨竊弄潢池之兵能擒諸偷以清闔境都府言狀有司覆實宜寵京司之陟入丞屯衛之聯益圖來勤用濟前美

陳安石可光祿寺丞制

敕某朕稽合年最褒敘吏勤勞弗外遺恩亦下究以爾策俊造之

目班宰字之條撫介山之舊封因陶唐之厚俗鳴弦所化蹊田自默治有能迹驛上計文擢預內卿之丞尚仍大邑之舊益思自效彌勉來勤

李擇可衛尉寺丞制

敕某仕以經藝敏有材資往字一同之氓善詰四封之盜施以方略得其主名就巢穴以悉擒致疆亭之增肅覽嘉勤績伸用賞條俾丞宿衛之司具寵追胥之效服茲旌陟益在慎修

馮安之可衛尉寺丞制

敕某曩從句簿委以算車校歲課而甚贏應賞條而當陟計司言狀衛府進丞尚敦廉飭之規取稱褒遷之命

曾班可衛尉寺丞制

敕某朕惟人材之難必儲備于無事而待用于歲時使所用出于所養然則才者豈其所自爲哉嘉汝好學文而能靜匠事之屬以試汝能益勵素守朕將觀焉

李式可衛尉寺丞制

敕某習廷尉之律優而入官典京府之獄敏于爲吏局無留事人用不冤尹以狀聞秩且歲滿臺有賞格府援舊規遷任法卿之丞尚寄決曹之劇益思營職勿廢前勞

劉景可衛尉寺丞制

敕某藉名門之資有幹局之用中銓調集經句簿書外臺薦延倚辦征算頗聞精力之敏且嘉課最之饒主計條聞大選覆上宜申朝賞之信俾丞門衛之嚴往服漸階勿隳前操

陳仲通燕仲舉竝可衛尉寺丞制

敕某等竝膺門第之育參列廷尉之平簠簋交修弦歌出宰奉法自守舉最當遷有司以聞褒典惟舊宜卽本寺進丞列卿尚敦撫字之方益圖愛利之政

王詔可衛尉寺丞商令聞可大理寺丞制

敕某等學優而仕服官勤勞或登佐于賓筵或近綏于邑政而幹

蠱咸力廉飭有聞章薦嗣升銓格斯應擢丞衛府參讞理官率示寵遷懋于祗恪

周宗閔可衛尉寺丞王正臣可光祿寺丞寇誦可大理寺丞制

敕某等憑世胄之資承夙訓之益中參京局外服官聯政以敏聞課亦羨著歲勞自白最狀頗明光祿號內卿衛尉掌門禁大理平疑法諸丞皆屬官就服茂恩無廢甘節

毛維藩可大理寺丞制

敕某早階科選兼敏吏資羸從尉察之司舉臨筦權之局置無遺力沛有羨緡迨滿歲而終更及有司之鈎覆審如功令宜信賞條擢任法卿之丞參司刑讞之典往祗朝渥彌服官箴

趙謹可大理寺丞制

敕某學通法家仕至郡掾曹事能舉履道益修監司之官保任獻狀終更之課鈎校應書擢居讞丞往傅平典益思潔慎庸對褒嘉蘇有可大理寺丞制

敕某治經預選習吏有勞掾于都輦之煩通乃刑名之學傳文無害援比當遷閣府奏之條陳擢理官之丞屬尚委例成之寄益畱明慎之思

鄭宗勵可大理寺丞制

敕某朕用天聖詔書拔舉令宰爾自尉察之任被監司之薦歷典二邑訖無違事大率可紀小如致疑選部以聞便廷以對合舉將前後之數除法卿丞屬之員勿替官箴往虔朕命

李士昌可大理寺丞制

敕某朕慎銅墨之寄惜才錦之傷特用詔書選拔令宰爾以資名應吾舉力局幹厥官治不煩苛居有愛利因加褒寵勿替厥心

王尹可大理寺丞制

敕某習通城旦之書資入州綱之任外釐煩局實賞牢盆力營近鹽之饒歲溢熬波之數終更結課遷陟應條用除棘路之丞往治竹刑之讞足伸家學益慎官箴

張太初可大理寺丞制

敕某辭中俊科才號能吏早隨選補之牒嘗署尉察之員近在東畿居當孔道剽輕聚類椎埋作姦主名起居莫不究悉根株窟穴盡得翦擒京府以言臺格應賞特丞刑讞之屬且旌方略之明勉服漸階益圖敏用

丁諷可大理寺丞制

敕某爾以膚敏之資被教忠之善曩從卿屬入寘書筵能服校讎之勞亟聞精審之最來援攷法參敘宿勤俾丞治讞之司尚仍刊籍之舊益崇門業往服朝榮

史宏可大理寺丞制

敕某緒承簪紳敏有局致曩升衛府列在京司具繫游刃之能俾幹摘山之利宣勤匪懈底績有成通驛奏以自陳按臺規而當陟遷丞讞寺進屬法卿就服朝恩勿遺公力

謝景祕可大理寺丞制

四
敕某夫舉最當遷增秩畱治西京良宰之故事也以爾烏衣舊族名臣之子志行修潔才章典蔚登科在甲治邑于東風政修明績伐來上參用有司之覆稍進理官之丞尚懋來勤圖濟光美
劉雖可大理寺丞制

敕某以學力之精階于進宦以吏資之習服在賓從亦用已知薦臨利局往幹牢盆之入頗增近監之饒滿課代還攸司覈實擢預法卿之屬往操刑讞之平惟服漸階勿更初節
趙丙可大理寺丞制

敕某承列掾之乏居被邊之衝隨遠檄以忘勤奉更書而無缺多有舉將參質攸司悉中保任之科宜膺擢敘之典丞于列寺佐乃法卿往服褻遷之恩勿渝正素之節
李孝孫可大理寺丞制

敕某早繇俊等參列京司倅邊壘之支軍控林胡之絕塞馳郡郵而上計覆官簿以應書稍進讞丞通爲法屬益懋終更之課勉思

臨履之方

雷簡夫可大理寺丞制

敕某出于名閥資有敏材領護渠防習知水事通谷口之派漑關內之田省疆隄捍固之煩獲泉源灌浸之利使者言狀有司質成勞實可嘉秩久未進特賞理官之屬尚繫行水之勤用振滯淹亦旌強濟

魏耆可大理寺丞制

敕某宰字嶠南發摘境內敏有方略勇于追胥多錄赭裾之姦大絕鳴梏之警亶無遺力休有厥勞本郡以爲言攸司曰當賞丞諸列寺佐我法卿尚勉來勤往祗顯拔

楚泰可大理寺丞依舊直講制

敕某朕選通經義誦說有法者勸導胄子爾本學力自致俊等邇因祭酒之薦置在詳講之員通敘外勞亦已久次雖中坐細故而見稱大臣參閱薦章足驗素行姑寵法卿之屬仍敷學省之經尚

圖後行母倦惠訓

楊南仲可大理寺丞知國子監書學兼篆石經制

敕某朕以首善在學至教本經將遠塞于異端宜圖刻于方礎敷求毫法緒正典文爾曷被薦延入預刊正見稱篆籀之學頗整字書之訛亦既肆勤宜有開勸進丞大理之屬關知小學之司勿替爾勞往虔茲渥

張初平可大理寺丞充堂後官制

敕某法學本精吏資兼敏曷委銅章之任尤著壺飧之清屬宰士之缺員絲銓流而膺選按文參試事條多通擢爲廷尉之丞寘于相府之掾勉思勤篤往服寵榮

馬中民可大理寺丞充堂後官制

敕某法學稔通廉規尤飭早從銓集嘗預賓籌會旅士之缺員試案文而習職擢升卿寺祇局常塗往服茂恩益思慎履
盧待舉郭宏竝可大理寺丞制

敕某等治后蒼之禮習蘇公之律進服官政更試吏資或以郡督郵之名典幹局事或用邑大夫之舉班錄縣條上治目而應書稽賞文而中法對升刑屬胥列京司往服茲榮勿更而守
張閻王熙竝可大理寺丞制

敕某等朝家以鹽茗二策籠山海之用置賞格以差殿最舉能吏以謹出納爾等竝以辭科之俊兼吏幹之敏更試大幕薦領煩局終更來上羨饒居多有司以聞應書當陟竝丞卿讞胥列京司往慎爾修以服茲寵

尹立李惟永竝可大理寺丞制

敕某等或治法家之書或階門胄之蔭能謹風訓善畏簡書以至任紀綱于州曹賦弦歌于縣寺職皆修舉政不煩苛監司章言銓審條白胥應攷功之歲竝遷治讞之丞當虔吾恩彌慎爾往
費子卿李孚佑竝可大理寺丞制

敕某等朕計大選之最拔羣吏之能才旣畢甄吏則胥勸以爾等

或修辭中俊級或治經有師法解經賦祿沿牒服官竝在諸侯之筵對書從事之檄薦延累牘遷陟應條擢居列寺之聯悉備法卿之屬益懷謹畏往服褒嘉

東莊王荀龍竝可大理寺丞制

敕某等本用經通悉中科等逮奉官使稔聞節廉資名且深慰薦亦眾因終更而赴集稽選舉而應書領出納于要藩善經營于劇事自陳勞最參覆計文課吏之法當遷理官之屬爲重近于通籍服在攸箴

陳禹臣李輔竝可大理寺丞制

敕某等或精法家之學或藉門胄之資入補吏員胥奉銓集尉于北部著發姦摘伏之能宰我寰封有撫弱字孤之惠公車交薦京府條聞居多名臣是其舉將足觀率履宜沛陟恩丞于法卿平乃疑讞尚服榮塗之漸勿忘素節之修

姚侃楊文仲竝可大理寺丞制

敕某等周制計治而賞漢法舉最以遷所以勸官成而勸吏力也以爾侷治容臺之禮中選明經以爾文仲出奕墅之甥得任官次施字人之縣譜典犇命之軍書力致稔聞章薦交集稽合銓程之格擢居刑讞之丞咸勉爾修以對吾寵

閻諤劉偃竝可大理寺丞制

敕某等國家務勸治功思究吏迹取信于保任之法視成于銓審之司申陟乃勞敘進其秩爾等本階蔭格亦起法科交蓄敏資參承幕職逮終更而齎伐咸被薦而應書與對便廷聯丞列寺往祇茂渥勿替清修

陳仲舒周曷竝可大理寺丞制

敕某等行己則修習吏而敏勲典別京之獄亦班劇縣之條訊刺得情撫綏有惠閱需章之交薦質攷格以竝優宜丞詳讞之司更委平反之任益圖來裕彌勛攸箴

劉汝言楊自周竝可大理寺丞制

敕某等朕聞設張薦格擢敘吏勤勞弗外遺恩亦下究以爾等久從選部之集參承幕府之籌介特無瑕幹固有力交章保任結課終更質諸有司審若眾奏擢預法卿之屬往服王官之箴益慎爾修勿忘茲寵

徐高丁爲寶韓昌竝可大理寺丞制

敕某等或治博士之經或通法家之學早階科選久服仕塗絜矩自將履官無缺瞻言按察之吏竝陳保任之章參服中銓胥應陟典宜進列卿之屬往居治讞之聯祇服茂恩益圖敏政

吳彥先劉易簡張庚竝可大理寺丞制

敕某等或進絲俊等關掌邸閣或任經宰理厯試按文或積有資名濟以風力參軍從事之畫居邑大夫之員悉奉更書來集大選閱文章之慰薦視齋伐之著明咸契陟科參丞法屬階榮塗而伊始堅素操而勿渝

孫傑可大理寺丞馬中庸可衛尉寺丞制

敕某等或以經拾青或緣蔭隨牒臨長邑室參列版曹字氓有聞領局且幹監司薦其善狀終更集于選部鈎校弗謬旌陟乃宜理官置丞衛府有屬竝寵京司之列勿忘士矩之修

孫薰可大理寺丞單鼎可太常寺太祝制

敕某等奮絲蔭格服在京聯臨宰右蜀之民典幹別都之帑越從官次列上年勤適敦汎勸之方爰用稍遷之法讞丞進秩祝史升名尚服箴言交修節素

杜諮可大理寺丞張文告可著作佐郎制

敕某等或積資至幕或被舉治縣參畫有補撫字弗苛監司薦聞銓覆應狀祕邱領著讞寺爲丞尚勉來課之修以對陟恩之茂綦愿劉濟竝可大理寺丞韓標可著作佐郎制

敕某等或力文升科或治經署第習知爲吏之敏舉遵行己之方幕有婉籌邑無通事薦書交于公府滿課集于銓臺擢佐修書之筵進丞治讞之署益思勉勵用對裒遷

朱達楊若冲竝可大理寺丞張安國可衛尉寺丞制

敕某等夫薦任之開所以拔能吏攷法之舉所以勸庶工以爾等或治曲臺之經或藉舊門之蔭預籌幕府獲佩縣章亦參法律之曹竝宜郡邑之力交章以薦終課而還質諸有司應乃褒典用爲刑讞之屬寵以宿衛之丞胥曰異恩彌飭廉矩

全余白祖或李秉竝可大理寺丞周復張熙竝可著作佐郎制

敕某等朕欲選清能拔寒素故保任之法專施監司而課覈之方一歸銓審參覆不謬褒陟乃行以爾或奮由才章或進以經藝預籌大幕領治一同亦從尉察之司往釐筦榷之局竝委束脩之士宜敷渥茂之恩領著史筵進丞法屬悉近朝闈之陟益宣公路之勤

李真卿可太常博士制

敕某夫賞以敘官治勸吏力有若名秩之美而得才彥之良乃允至公不爲妄施以爾少厲風迹參服文雅班我外著丞于祕邱出

算商車入奏計簿校府緝而增益質臺格以應遷宜擢乃官且申吾信矧惟相薊之地差近握蘭之資尚當勉之務識遠者章峴可太常博士制

敕博士典相儀禮贊導乘輿今雖置員溢于舊制猶曰美秩屬之清流以爾某聯郇國之華有閩士之望世用儒雅顯政以風迹聞會奉更書還奏成伐參質不謬序遷有典資淹中之學講野外之絕往祇褒寵勿替厥修

李復奎可太常博士制

敕某朕以監牧之繁沿使職之建將協濟于厥務亦參簡于乃僚屬當滿課之成宜敘懋官之陟以爾奮繇名閥綽負敏才更倅州藩頗厲風迹逮預王閑之掌時聞馬政之修校齋伐而弗誣進容臺而惟允勿懈于素尙勉乃求

李師中李建中竝可太常博士制

敕某等太常典禮樂博士通古今必得美材以相儀範雖員品至

隘而資望益清儒者所居朝選爲貴以爾師中性無外飾器有遠用以爾建中學力強敏吏資肅給竝策俊髦之第咸稱風矩之修或典校禁中之書按行寰內之邑或董司漕引之舸兼握宰字之條參敘成功交中攷法率從盾省聯陟容臺尚當勉之以對我稍遷之典

丁宗臣可太常博士丁寶臣可太常丞制

敕某等國家試功之典參任以職攷課之法質成于閏用甄美效亦存至勸以爾宗臣吏資強敏器質莊重以爾寶臣文典而蔚才敏且精是惟天倫竝入吾彀所試有迹厥修弗愆或鳴絃以字人或剖符而守境竝時上計據法得遷入丞樂卿進掌儀蒞悉號朝闈之美足爲家閥之榮就服寵褒益思勉勵

張師中可太常博士游奎可祕書丞陳知德可大理評事制

敕朕用閏成之比計吏治之修雖官有大小之差而法無內外之異所以均朝賞壹臺制也以爾師中材質粹美風業修舉以爾奎

南士之秀以爾知德舊門之良稔服朝聯升預京局中幹事職外握縣條來上勤庸參應褒典西京重于博士江左美于王官至于詳讞之聯竝爲進陟之美欽祗無忽褒勸在茲

郭祐侯瑾竝可太常博士陳儼可國子博士侯訢可殿中丞制

敕某等夫一閏之法天氣小備施于人事故可以較官成懋臺賞以爾等拱治朝之次有著在廷宣外服之勞弗懈于位竭一官之智效上三最而歲優胥中陟科差進榮秩寵以博通之士丞諸盾尚之聯就服褒華益思清約

張絳可太常博士商體仁可殿中丞臧師顏黃仲英竝可國子博士制

敕某等昔堯以職而試臣漢用法而課吏咸責實以觀效亦累優而取陟以爾等士矩尤飭吏文滋習謹政修之賦則嚴而不苛事裁局之繁則敏而能力績成所治章下有司較閥閱而信然稽功能而審若差進容臺之秩參服上庠之聯乃及盾尚之丞并通表

著之籍往踐厥職彌懋爾勤

單煦可太常博士焦盛王傅張允竝可國子博士馬直方王延慶

明穆歐陽炳張仲宣竝可太子中舍人制

敕某等或修辭干祿或治經服官亦藉舊門之資早承食德之美擢升門序列置京司參服吏勞協宣公力條陳滿課鉤校陟書實有積勤訖無通事稍遷禮閣敘進經庠乃暨奉儲之僚竝預班朝之藉咸思砥節用慰遷恩

寘母沆可太常博士閻邱孝終張士明江正倫竝可太子中舍人

制局實母複姓不經見寘字似誤據制詞以局對容臺又似閻邱孝終下有脫文

敕某等或拔自王國之髦或通乃師門之學亦緣蔭格參服廉規臨政有聞處躬無缺竝上閭成之法咸稱吏治之良覆案信然褒升允若容臺相儀典之重盾局掌名物之煩東禁奉儲外廷有位尚屬首公之敏用虔進秩之榮

武康可太常博士裴耕馬先張應符申屠會竝可殿中丞史珍薛

端竝可守太子中舍人李巽可大理評事制

敕某等朕日者右饗合宮咸澤庶位竝甄一等之秩用洽三神之和爾等類偕曲恩差進茂級而滿課已上攷格當遷吏勞不可以外遺王澤當令于下究竝申後寵匪隔前恩往承朝綽之華勿替王官之守

潘夙可國子博士制

敕某蚤班朝次彘守嶠南蔚有敏才條郡邑之治沛然精力籠山澤之宜銅冶以興泉府攸賴會奉終更之計有嘉實至之勞擢任儒林之官參司胄子之教益圖志用往服品儀

武宗元可國子博士制

敕某爾藉外嫻之資預中朝之籍假以別乘倅于方州自挂刑章黜臨利局因今課之云集援攷法以自言進之成均任以博士宜思既往之謬當服非常之恩尚勵來勤庶幾補過

許恢李田尹偕竝可國子博士制

敕某等夫賞者國之砥石而官之利器先王所以嘉善磨鈍績用是生法曰攷功謂此物也以爾等清修著聞強濟有力或舊德是食或治經甚究參施吏敏胥服朝聯竝修官下之勤交中閏成之典進遷學省充預教官在儀品以至高尚箴規之相勉

何夢昇可國子博士李旬可殿中丞制

敕某等進以經術守在廉隅敏有吏資善索民隱參領軍和之壘分乘州倅之車悉上最文交中褒典用進經庠之秩亦遷盾省之丞有嘉治優無忘節素

牛拱辰可國子博士吳穆周諧陳舍竝可太子中舍人制

敕某等竝達于從政恪在首公馴致法丞參服盾署或以弦歌之最著厥縣同或以征算之饒淹于局次有司獻狀主計爲言年庸有成臺格應賞經庠峻于儀品儲案籍于班聯竝爲茂恩益樹勤績

李元方可國子博士范袞郝大同竝可守殿中丞呂惟和崔象明

竝可殿中丞黃延慶可右贊善大夫制

敕某等籍通王官名任宰士于規隨而尤曉亦幹固之兼資允屬三宮之文追復九房之祀推行制度省闕繁文亦繁敏用之明不爽先庚之素勤庸屢試汎等宜優入典經庠進丞盾省逮儲坊之僚屬皆朝序之聯華往服褻遷益思恭慎

劉淵可試國子四門助教制

敕某執方技之學游貴要之門且有薦言乞從補授宜試員于庠序俾脫迹于閭閻匪預銓流尚祇朝渥

樂永可試國子四門助教制

敕某挾醫砭之術精齊和之宜事吾大臣越在行府章言謹幹之狀參敘勤久之勞就除學員尚執方技且從舊德之請勿廢曷時之勤

劉可久可試國子四門助教制

敕某早挾方書嘗游戚畹在舊勤而可紀屬遺札之爲言用優經

省之名匪預銓流之集往虔次補益在勤修

曹博文可特授太常寺太祝制

敕某姻連椒塗族漸河潤早試理官之屬尚拘選籍之名誕節推恩後宮著令且有祈恩之請特從升秩之遷遂列京司往祇祝史孫琪可太常寺太祝制

敕某早沿蔭格嘗補匠員造邁親喪謝去官次尋外除從吉之始在季秋宗祀之前來援慶條且有比例宜遷榮于祝史尚助志于政經

姚預可太常寺太祝制

祝可知

太祝下當有脫文制詞內有某等爾等字樣非一人可知又有對升儲案語非大

敕某等惟庶工之陟用三基之成弗遺外勞略存大勸爾等竝通習吏治底慎官箴宣風力而有聞飾士矩而無缺縣條修舉局課衍盈灼有計文合于賞格對升儲案之秩差進祝史之聯參服褒嘉交思勉勵

聶平仲可太常寺太祝制

敕某詞臣之後年妙志美食于舊德綽有敏資曷用正朋之名出從外局之試安和備于諸事出納謹于有司齋伐應書賞勞申信稍遷祝史之秩且旌門子之良勿頽家聲當志于學

魏纁可太常寺太祝制

敕某早資蔭格造正匠員掌庾大江之潯奏課高閣之下質官成而既效攷歲比以當遷用升祝史之名稍進京司之秩勉思謹節用對陟恩

裴士傑可太常寺太祝制

敕某句匠屬之稽當庾氏之掌能精出納之吝頗聞臨履之修臺敘三期之勤朝獎一官之效稍遷祝筴往服明綸

陳京可太常寺太祝制

敕某佐選外之邑在句稽之員奉檄外臺采山北境歲有羨數材以敏聞質之有司應于著格在勤可紀雖遠弗遺擢預京司往尸

祝策尚承舊貫勉續前勞

吳瑛方蘋竝可太常寺太祝制

敕某等承舊門之資預大臣之薦參試事任善持箴規不蹈悔尤且正閎闕已實有司之覆宜從祝史之遷汎錄小勤勉圖永譽

張慶隨可中書主事孟可道可中書守闕主事盧克用可中書錄

事制

敕某等敏有吏資服在公府練事經而克暢親几案以爲勤行檢竝修功次可紀或稍遷于右局或少待于缺員竝爲進陟之恩益務恪恭之守

陳叔度可大理評事制

敕某天水扼羌胡之衝据汧隴之勝盛秋在戍重兵畱屯爾曷承賓籌參委邊糴能宣力政以集糧道穀既有備羌不敢動計臺舉最帥府言狀參覆不謬裒進是宜升屬列卿平亭疑法平亭原本今據漢書張湯傳改正往祗恩陟勿廢節修

程旬可大理評事制

敕某家世在南擅吳士之望考服能政稱漢吏之循爾階緣任子之科馴致列卿之屬曷因薄罪之坐適領遠方之征課習有司法得遷秩用進丞于棘路往治讞于竹刑無忘聿修有以自效

張諷可大理評事制

敕某臺屬有簿句檢稽失近制選任委之丞長爾以材被薦計書代期中司列言居職無缺賞有前比法當得遷姑擢廷尉之平尚仍憲府之舊往圖滿課勿廢前勞

張希甫可大理評事制

敕某廷尉天下之平丞屬所選枉直攸寄爾以華腴之蔭試儲校之員雖不積吏勤而稍涉年序加有外戚之請宜佐法卿之評驟列京司益慎朝檢

馬琮可大理評事制

敕某藉門曹之資預京司之列尸于祝策領我祠官試諸事局之

煩聞其吏力之幹年庸當陟刑讞是評不遺爾勤往服吾渥
俞祐甫可換大理評事制

敕某早藉掖塗之資遂階使級之選頗聞幹局稍最輶車求換職
于京師俾評刑于卿局尚敦素履無忝清修

馬玘扈高王誦竝可大理評事制

敕某等承世閥之美號門子之良參列京司分條事職以年勞而
自上稽臺格以當選用擢佐于理官俾評廷于疑法無替爾職尚
謹攸箴

任承德可試大理評事制

敕某曷因薦任之牘擢爲宰字之官邑在甬東地連越絕政惠且
敏節廉而修代還中銓條上初課臺省明格軍有從事幸無草檄
之急尚寄鳴絃之舊往圖後效來究前恩

路諫可試大理評事制

敕某爾前以調補尉員督縣之盜賊今以資中都吏任郡之紀綱

曷擒寇偷實著閱閱所部上勞攷有司舉賞格功疑惟重賞以申
信擢參幕裏之畫脫去府中之趨茲爲異恩尚圖來效

馬知良可司天監丞制

敕某傳疇人之業參保章之屬祇勤無懈占候有勞俾攷績于攸
司命遷丞于本局尚隸陵宮之職往欽臺檢之恩

丁濤可司天冬官正制

敕某傳疇人之業任冬卿之丞思湛密而寡尤術推步而多驗有
司較最在法得遷宜升和叔之聯且寵石申之學

周琮李用晦竝可司天中官正于淵舒易簡竝可司天監丞王士

隆可守少府監主簿充翰林待詔制

敕某言天之學古有三家粵若渾儀昭合乾體朕緬懷往範恐失
舊傳因命究研且令制作適觀成績第用賞勞爾等通甘石之經
深梓慎之術能奉吾詔咸竭乃精克正規模弗愆暑度差進清臺
之秩并預禁林之聯往服朝恩無替爾職

文集十四
五
祁咸亨可少府監主簿制

敕某習知方技祇服禁庭曷經忘祀之恩猶滯句稽之秩慶條具在匠簿是升勉思官守之勤姑對朝恩之茂

王德說可將作監主簿制

敕某以句稽之名承庀官之乏守在尉察善于追胥多獲椎埋之姦有嘉強幹之力疆亭息警州部列言較臺格而當遷用匠員而申信往虔吾渥勿廢爾修

張潮可將作監丞崔公孺可大理評事制

敕某等在賓輔之地振津陸之要惟是支局分隸屬邑爾以質幹之敏上等課之成征有羨緡酷多餘息放于末利在道則非恪于首公其勤可錄進升匠屬擢任刑評往祇甄敘之恩勿忘修飭之素

文恭集卷十四

文恭集卷十五

外制

葛源可司封員外郎制

敕國家沿挾銅之令以收七福因采山之法用廣五銖參選幹能分泄經畫屬敘稍遷之典宜推加異之恩具官某材堪治煩政有能迹嘗更守于列郡適分委于輶車按南州寶冶之饒佐縣官圖府之用宣勞于外興利在公章敘前勤聯及今績宜寵左曹之秩用優主爵之名就虔吾恩益營乃職

田京可度支員外郎元積中楊佐竝可屯田員外郎胡世卿可國子博士制

敕具官某等夫勞之弗圖治道或弛賞以合勸政體乃修歷代攷課之規所以聳善而旌伐也以爾等敏有才具蔚爲時髦或文雅自將飭士範而無缺或法律可任條吏事而有餘參服治朝之聯分持眾職之劇有資優而望舊或課最而職修胥應陟書差進清

秩稍遷支度初拜墾屯竝爲郎選之華且旌文士之美尚圖來績庸對茂恩

盧成可度支員外郎吳祕可屯田員外郎張珪可虞部員外郎陳象之可比部員外郎制

敕具官某等朕沿三歲之比稽庶位之勞表顯治功差升茂秩況存至勸抑惟舊章爾等體行莊修力局開敏參穆王官之序分條吏職之煩或擁傳巡行按章覆讞糾虔中法平處弗冤或守境寬平監州敏肅竝援功次之令具條官闕之成校最信然進秩宜爾支度要部比句劇曹乃至虞衡之司悉通辰象之應尚懷擢序勿替厥修

吳授可金部員外郎制

敕具官某任宰旅之士稱公臣之良總振諸曹之綱習知決事之目資有敏濟號爲練更適者攷制九筵奉祠五室惟禮文之繁縟經几案之推行令有先庚之明事無愆素之闕肆勤可紀覃賞用

優稍遷應宿之郎俾進司金之秩往承襄渥益務恪恭

吳授可主客員外郎制

敕某朕用閏成之法稽官治之勞矧乃宰士之良任夫公府之重練更有補擢敘則宜以爾行義俱優力局參敏選自銓流之美嘉其士矩之修寘諸堂塗寵以朝秩試右曹之劇則書案弗畱委都目之繁則事條畢舉稽歲庸而懋著閱府奏以敘陳較然宿勤協于攷法春官有屬建禮爲郎仍序貴臺之廷兼煥積星之位益圖慎履用對遷恩

呂公弼可兵部員外郎制

敕某官著攷法雖審較于行能職重首曹亦參視于人地以爾承世濟之善有德器之稱中握計籌外按使斧臨劇煩而自若躬和粹而弗流選自省聯攝糾都獄雖平反之尚淺在審克而則精更試之效已聞稍遷之典惟舊姑寵七兵之秩用服一臺之華往服茂恩勉濟遠業

張環可兵部員外郎制

敕具官某夫振滯淹者所以圖官次之效獎沖退者所以厚天下之風伸以旌褒聳夫流蔽以爾敏文強識遠量直躬履通介而能全安醜夷而忘競善處其厚有隨和而弗珍能裁諸煩迎干鎮而立斷中祕入直外治數更久次而不改其常眾競而獨安于靜朕心嘉此議者賢之特推躡等之恩用獎秉彝之操七兵之屬秩峻中臺三吳之佳使優諸部尚繫舊貫勉緒成勞

徐宗況可兵部員外郎陳旭吳奎可起居舍人制

敕某等朕永思孝道儀刑前王卽路寢之祕嚴修合宮之齋享率義而尊配典明德以薦馨香神靈居歆天人合貺因以孚朝慶之典時則厚諫雷之臣以爾宗況行義清修志力强正以爾旭夙識經遠學術研幽以爾奎方潔無渝勁正不撓竝以瓌望而充本朝或嘗冠惠文論事有切劘之益或入對制策納忠無回隱之私置之諫垣補我闕職復能奮繇直道數進苦言逮齋祓之陪祠率嚴

恭而服禮熙成受祉覃施澤勞入妙一臺進聯二史往承茲渥益思而忠

張中庸可兵部員外郎高良夫可金部員外郎解賓王可兵部郎中石揚休可祠部員外郎制

敕具官某朕格太室還祀明堂靡神不宗惟帝是饗至陽顯見休景晏溫受茲元祺均爾庶位以明祝釐之美不欲專之朕躬以爾等選自臺觀之華參裁都輦之劇奉若吾語虔乃祠事靖共在列奏假無言詩不云乎奉璋峩峩髦士攸宜疇茲成勞進爾茂秩柱史職雖峻臺郎選亦清睠言四士之良竝從一等之汎益思自效其在懋承

麻溫故可職方員外郎制

敕朕據閏成之法校吏治之最先期以勤遠急賞而勸勞以爾某術學兼資質文參映躬清素之履服澹退之尚潛在郎署曾醜夷之弗爭孤于守藩亦名教之爲樂宣我勤約之詔敷于豈弟之風

條上計文覆應褒典亦以久法是宜稍遷臺郎主于文書職方辨于圖志且獎弱翁之行勿與顏駟之嗟

陳巽可職方員外郎制

敕具官某夫寬柔以教者南方之俗安靜不苛者循吏之治上計若最進秩宜優以爾擢從峻良乃服清素果于從政篤在首公以中臺之秋聯委臨川之朱轂績效著于列郡闕閱集于有司參校不誣擢敘為允進司方志之掌居為名秩之華往佐夏官尚圖民瘼

凌景陽可職方員外郎制

敕具官某夫詳試政事稽參治狀因閏成以大比用最法以次遷直無遺勞姑用振滯以爾著南土之望服中臺之員名有清文濟以美政來上滿計交應陟科稍遷右曹且服前列臺郎漢制主作文書職方夏官掌領圖志竝為名秩之美允宜才彥之居尚懋厥官往欽茲寵

謝頤素可職方員外郎趙慎微可比部員外郎王得賢可虞部員

外郎張擇仁可太常博士冀尚王日宣竝可太子中舍人制

敕某等夫吏績成于外賞格著于中因闕閱之成勞速置郵而傳命就用遷秩以明亟賞爾等資承吏幹之敏參服王官之采肅將朝委領刺州疆或宣賦縣條或典幹事局有寬平愛物之迹無煩苛峻民之譏列上計文優中遷法臺職之劇則有主方貢司物計

案此下似脫惟山澤之大繫虞衡之掌至于奉常儀蕝承華僚選

咸用流品之入差次名秩之除旌陟在茲欽祗無忽

李郊可駕部員外郎元絳可都官員外郎李頌可太常博士林盛

可國子博士制

敕某等夫陟典之寬則才路無壅攷法之密則課目難究歲以為限時惟厥中以爾剡才敏政成習為吏之術以爾絳文清行茂贊治財之策以爾頌風業修舉所至有稱以爾盛吏文淹通號為無害竝條守宰之效參敘支度之勞治功較然恩典宜及承司駕中

都之務進容臺太學之聯竝爲懋遷尚思來效

管朝宗可庫部員外郎徐峻可太常博士董壽范存竝可殿中丞
呂公垂可右贊善大夫李需趙昌王乾祐竝可太子中舍人制
敕某等書伐以期視成于閏攷合功令差進秩次使在位者得以
勸仰而有力者無所忽遺爾等或擢自秀科或奮從力學亦階舊
德之食參賦治民之經安靜無華廉平有迹類上三年之計進稽
六敘之文據法當遷在賞宜信司甲待事抱藎相儀尚丞典名物
之煩儲案通表著之籍竝爲朝選之美就服詔除之榮務推精誠
勉思政術

劉杞可都官員外郎制

敕某朕咨擇州將出賦朝經參置郎官遙承臺務差進秩次褒勸
治功以爾本廉茂之升資庸敏之用比更試于煩事適假守于劉
城政舉以修計上曰最義圖汎勸法著稍遷擢之秋聯典我隸士
尚謹循良之目以承甄寵之恩

錢括可都官員外郎張師皋可虞部員外郎制

敕某等夫堯之熙眾績則曰明試以功周之較羣吏則曰敘正其
治咸所以攷政實辨才否然後論陟之也以爾括階仕科而尚風
業以爾師皋任門籍而有幹資竝馴致周行亦更試煩事或臨淮
之劇方駕倅車或砥柱之艱參督漕舸來上歲課胥協賞條都隸
進聯澤虞升秩竝丞省局之務且旌官閥之勞勉服恩章益敦士
檢

楊中和可都官員外郎呂惟簡可司門郎中制

敕國家敘進庶工之才均用一閏之法雖閒劇之職不類而褒勸
之典略同以爾中和經術尤明行能兼美早傳先王之業久居博
士之講以爾惟簡承公族之舊稔吏文之資或引疾養和請奉琳
館或剖符治遠邈在銅梁竝因官成差進郎秩典臨都隸之劇掌
司門籥之嚴就服稍遷之恩勿廢聿修之節

楊延可都官員外郎李唐卿可太常博士許立可國子博士制

敕某等朕敘進羣治優先外勞施則勝平恩不遺遠爾等以力局之敏兼風矩之修服在王官參條吏職或前更邸肆之掌課有甚羸或分樹郡邑之風政號連最有司獻狀主計爲言績計較然賞固宜爾中都擢序儀範典司至于庠學之聯竝爲朝秩之美益思砥節尚勵忠勤

李及之可都官員外郎董沔可屯田員外郎范微之蔡準竝可祕書丞制

敕某等夫砥石之設所以礪鋒鏑攷法之建所以聳行能限年而升惟官是懋以爾及之性理明決資練更之敏以爾沔風識幹舉參支度之劇微之以名門之雋準以幹時之良竝奮繇藝文而更試風政休有最目宜應陟書秋臺都隸之聯冬官墾屯之屬進丞祕局預班外朝用服竝時之恩悉號清流之選益思淬琢胥服褒華

楊志可都官員外郎王正民可虞部員外郎呂協可殿中丞李述

可祕書丞制

敕國家振小大之職壹內外之治著定攷法申敘眾功勞之弗遺善用是勸具官某等達于從政敏在首公或關握守符或顓促漕舸近沂二河之險遠涉三湘之艱陶穴古公之餘羅池柳侯之舊流風尚篤遺詠未衰雜治厥官參茂乃績鉤校如法甄陟應條稍遷都隸之曹超敘澤虞之職清臺第一尚局有升對丞郎署竝籍朝聯各修庖俎之方彌慎簡書之訓

彭思永可都官員外郎劉述謝顓竝可屯田員外郎柳三接可太常博士制

敕某等計年校課所以法一閏之成進秩敘勞所以聳羣吏之勸寔失于廣不傷其情以爾等竝南金之英預臨軒之選或辭章典蔚或經術通明飭諸行能則體和而粹試之政事則財敏而通官成較然歲亦勞止通用前勤之敘竝從上秩之遷都隸秋聯屯墾冬屬逮于儀範之典竝爲官制之佳咸慎爾修往副吾詔

危佑可都官員外郎李敏可虞部員外郎高靖可太常博士張大受可殿中丞制

敕某等夫吏領外治歲有成庸若勞之弗圖則善何以勸爾等或挾文儒之術或治刑名之書延登諸朝參試以政外求郡邑之瘼上布闕庭之恩公力弗遺治迹可尚閱其來伐應于陟科都隸澤虞曲臺盾省進承建禮之務升敘班朝之華就服寵靈益修風業勉綏民隱善持官箴

張士燮可都官員外郎李九言馬仲甫黃鑄竝可屯田員外郎王仲可國子博士制

敕某等夫信賞則官政修舉勞則吏力奮誼存開勸法在攷課以爾等或用才章之秀拔從時髦有以經術之明取于家學亦藉舊德咸序治朝分乘倅車領治和壘謹牢盆之出納總都吏之紀綱節皆素修才亦兼敏沛然政舉第以職遷鈎校弗疑旌陟惟允進秋臺者以都隸爲峻陟郎省者以墾屯爲初至于庠學之聯悉爲

朝選之茂恩不妄施功以敏興勉而來勤對我斯寵

寶平可比部員外郎景融可太常博士制

敕某等有著在庭服勞于位或遠爲邛笮之守或近倅關隴之城對賦政條參閱計簿咸績成勞之最宜從攷法之遷進司計于中臺典蒞儀于禮閣竝爲茂秩往虔吾恩

馬伸可比部員外郎陳益可國子博士制

敕某等朕沿功令之舊攷官治之成若乃倅列郡而有勞宰東畿而能力申懋厥賞差進以秩爾等本食德之起用治經之明入服朝聯更試吏事治有勤狀法得次遷稍升比計之曹益寘博通之列進丞郎務往服教官勿替厥修以虔褒寵

王積可比部員外郎李祐之可水部員外郎毋澁可屯田員外郎制

敕某等夫任外員之郎丞諸曹之務秋局比計顓尸句法至于工起之屬則有掌河渠諸水領戶口墾田竝爲右司之華咸慎南宮

之選以爾等以藝文資術進服王官以法律教條班行民政咸有可紀適觀厥成爰酬營職之勞且示攷功之法舉用參職竝列壹臺往祗躡等之恩益圖來治之美

周世南邢至竝可比部員外郎聶世卿可都官員外郎石洵直可屯田員外郎制

敕某等文昌法宮積星郎位古之元士職在中臺若乃掌都隸主句計胥乃墾田之屬咸曰右曹之選今釐務雖廢而遷秩益榮爾等稔服吏資練更民治或班錄列城之詔或分駕別車之行績用自陳閏成可攷竝差進于前秩尚畱試于外勞就虔吾恩勉思乃職

郭亨吳迪竝可比部員外郎馮溫舒可屯田員外郎張承慤可水部員外郎張仲莊可太常博士寇玘李咸熙張景純竝可國子博士制

敕某等昔堯以職而試臣漢用法而課吏咸責實以觀效亦累優

而取陟以爾等士矩尤飭吏文滋習謹政條之賦則嚴而不苛裁事局之繁則敏而能力績成所治章下有司較閱閱而信然稽功令而審若差進中臺之秩參服上庠之聯資地本優儀品兼峻往踐乃職彌茂爾勤

張道可屯田員外郎制

敕具官某國家均用一閏大比庶工所以旌吏勞而懋官賞也以爾選自造秀濟以方潔參試以事果于從政服在外朝之次相我曲臺之儀齋伐自陳司蒞且久有嘉臨履之狀俾擢墾屯之曹初升中臺且應列宿茲惟敘進之典往服稍遷之恩

吳伸可屯田員外郎制

敕某征算之法贍入縣官功令之條勸進吏力以爾本髦彥之選資強濟之材百鍊不銷器業兼韞曷資游刃委算商車能柅下姦善集公利最效尤著計部列言合賞格而有餘在陟恩而可愛從司蒞之相禮進起草之爲郎往服墾曹且信吾賞

呂公孺呂公著竝可屯田員外郎制

敕某等朕褒優治民詳慎課吏均用一閏參比眾功治最必甄節廉者起爾等竝舊相之子濟名門之美率繇科等之奮咸服吏資之敏耿純獲試郡之請仲舉被題輿之招悉上計文交中褒典在勞可紀于法得遷郎有墾屯之官時謂拜除之美謝去相蒞初得握蘭足爲競爽之榮益敦清勵之志

王鼎鄭炳王微竝可屯田員外郎制

敕某等夫賞不失勸治功日興勞有所甄吏力彌奮限年會課計最陟能所以旌已試之勤聳來者之進也以爾鼎政有風迹以爾炳行無緇磷以爾微出名臣之門服清德之訓竝班朝有素而居官可紀適因郡計之上咸敘官治之成參覆有司胥應陟典宜踐中臺之局悉置副郎之聯茲惟寵章以對嘉績無廢敦厲往服褒優

王中立可屯田員外郎李希逸可國子博士制

敕某等或策偃商之科或治臬蘇之律飭修士矩明習吏資屢條民治之成寢服王官之次鞏洛都府門握左符汧隴疆藩分駕別乘胥上勞攷參質有司灼著勤庸差進美秩墾屯丞于部務博通領于儒林竝爲儀品之華尚敦風教之俗

趙誠可屯田員外郎黃炳宋宏竝可太常博士制

敕某等昔魏氏攷法用京房之遺意載在前史傷于至密朕因二典之舊用三歲之比旣簡且久有勞弗遺爾等竝志行端修藝文參韞果于從政長于治民績用適成代還居最質有司而不繆延便坐而與言急于信賞勸諸勤能墾屯右曹臺美初拜縣蒞清局官重博士竝佳時彥用沛朝榮尚慎周官之箴往服漢儀之選張靖可屯田員外郎彭文紀崔鵠竝可殿中丞王瑜可大理寺丞

制

敕某等夫風化之原參寄守宰官賞之令博攷治功爾等率奉詔書分長郡邑履尚簡素治乏煩苛居官有可紀之能在法應當遷

之典臺郎初拜以墾曹爲佳盾局稍遷得尚丞曰美胥泊法卿之屬尤爲列寺之榮悉虔吾恩無替乃職

張輿可屯田員外郎艾保卿沈遵竝可殿中丞李昭慶可太子中舍人制

敕某等朕稽勞類能博攷眾職限年增秩汎勸庶工爾等用辭學之優或世資之舊進服王官之序屢試文吏之煩關握符書參布條教居官之迹可紀課吏之法當遷第用厥勞差進以秩墾田司盾東省承華竝通文石之班往服治朝之寵益思自效無忘稍遷薛仲簡可屯田員外郎蔣祕卜仲竝可太常博士馬仲旦可殿中

丞制

敕朕攷內外吏職算計見效累優以成陟急賞以申信故功懋者進而節廉者起具官某等或奮從造秀或蔭自官華竝服王官之箴咸從朝著之後更試政事參訪行能或典守列城流豈弟之化或長治劇邑宣愛利之風條上年庸申校吏迹在狀甚白于法宜

遷超敘右曹實墾屯戶口之賞稍遷禮閣有贊導乘輿之榮至于盾省之聯竝號朝闈之美往祇渥茂勿廢操修

劉錫可虞部員外郎高賦可太常博士制

敕某等或治經階仕或論秀升科進序王官參佩朝絨長治州任關握郡條竝敘臨履之勞來援遷陟之典法當差級歲已再周質諸有司則罔後殿宜承郎省之務往踐儀臺之華離石近邊資中遠郡好爲政事勤恤吏民服我茂恩期爾來效

田化愚可虞部員外郎鄭偕可太常博士張當可殿中丞制

敕某等夫守宰爲任最親斯民政伐有成宜疇吾賞以爾等或仕緣鄉物或進藉世資繇官次之累勤自朝聯而進序劔外班政迹著不苛寰內字民文稱無害竝用年勤之茂合于功懋之科升領澤虞典司儀藹至于盾省之屬竝爲朝絨之華就祇臺恩尚圖官治

路綸可虞部員外郎汲熙載可太常博士裴見素可國子博士馬

璟可衛尉寺丞制

敕某等賓興以文入預吾毅或沿家學之進亦資世賞之延稔服吏能分從官使關掌郡佐參布縣條領算商車通著最目有司覆實彝格應遷司訓虞典襄勤野蕝至于經序之選均爲朝品之華當思力公勿爲官忝

陳式劉充中蘇顯竝可虞部員外郎林克從可國子博士呂規王宗古竝可殿中丞制

敕某等或經明家學或地襲世資操行旣修風力兼敏寢從吏事之試參服王官之聯分握左符按行別乘竝宜寬大之詔綽有愛利之風列上勤庸胥合賞格差進中臺之秩超敘上庠之資至于盾省之華竝爲朝序之美往虔茲寵用慎爾修

朱湜李隨竝可虞部員外郎劉襲禮可太常博士黃淳朱處約竝可殿中丞張赴可太子中舍人制

敕某等詳試則吏職修敘進則官治勸攷課之法若天下之砥石

所以聳行義而激節廉也爾等或治經素明而食惟舊德或進以文雅而拔諸峻良參服王官分條民政歷三期而成最用羣吏之計治鉤覆中典差次命秩進山虞以承務陪野蕝而相儀盾省入丞儲禁升屬且申吾賞彌勸爾勞

武周可檢校水部員外郎制

敕某隨近藩之牒預幕府之籌參畫有勞終更無缺來趨銓集援敘慶條宜寵臺員之名且申效演之信往服褻渥勿廢清修

黃延慶可檢校水部員外郎充堂後官制

敕某稔聞幹用守在廉規服從相府之嚴主領右曹之劇案文尤習履尚兼修升次宰旅之聯用進堂塗之掌且疇勞課就服遷恩吳世長可檢校水部員外郎充堂後官制

敕某材質謹良志用開敏服在相君之府齒于宰士之聯慎守箴規習知事典歷年霜而寢久屬府牘之條聞有嘉列掾之良擢序右曹之長尚圖幹效取對褻遷

文集卷十五

文集卷十六

外制

富弼可資政殿大學士依前給事中制

敕朕設別殿之職寵名儒之賢資其學優居乃詢于道術倚其名
重出則殿于翰垣惟吾體貌之臣適寄股肱之郡宜疇功次益峻
儀刑以爾具官某履正蹈方秉文經武才周通于治體識迎照于
幾先曷復賢科首躋德舉籍甚朝廷之望居然廊廟之姿直質弗
流讜言罔伏殊疆出對挾無所憚之心大節粹臨有不可奪之色
高其忠力嘉乃謀謨擢亞內樞屢籌前箸愍勞久職歷寄二藩瞻
言表海之邦號曰東秦之重教條班錄恩信施行流傭自歸苛慝
不作厥勞甚茂乃矐方深忽覽來章姑求便郡深惟舒緩之俗方
資控帶之才況德刑已孚難驟移于守相而土風可樂足奉侍于
慈親曷進貳于禮卿復條陳于讓牘雖高已節終鬱朕心是用褒
進大名申昭異數斯協至公之典以將東顧之懷少煩撫臨益在

綏靖惟當懋勉以亮倚毗

楊察可龍圖閣學士歐陽修可龍圖閣直學士制

敕思文先朝游心往籍因層構之建設近職之華所以寵名儒訪治道我圖俊舊之望時惟鯁亮之姿差進禁聯胥協公議具官楊某精白博洽端粹正方擢在禁林復典謨而歸厚置之憲席處論議而不阿具官歐陽某識遠才長文高行潔篤于信道不讀非聖之書忠于本朝屢條當世之務並膺左右之選歷宣內外之勞峻節弗渝清議彌勝用進祕圖之拜且光舊物之還旌乃名臣敷于茂典爾身在外朕心弗忘嘉茲來忠勿懲前事

施昌言可龍圖閣直學士制

敕國家藏錄祕文興峙宏構竝建禁職參寵美才用優承學之名必取高時之彥矧鴻都待制之久兼外臺將漕之煩積其成勞進于近著具官某思理通敏風業宏深早宣績于本朝遄升名于內閣歷更邊部之任洵持漕節之行董淮海之轉輸濟京師之支度

仍歲勞止厥績茂焉有嘉經畫之明用陟禁嚴之等品儀滋峻恩數昭升尚繁膚敏之才仍寄劇煩之職就祗茂渥勉續前勞

丁度可兵部侍郎張觀可尚書左丞制

敕朕圖政弼之舊嘉老成之人進退無于閒言出處全乎美節功庸前懋朝野式瞻特升爵秩之榮益示儀刑之峻具官丁某志經道德性合誠明典冊擅乎辭宗風業推于時匠具官張某材含厚棟體合大圭德好是民彝仁以爲己任竝歷更眾職宣暢本朝承詔旨于鑿坡備勸講于帷幄匪惟授道多所納忠資其器略之賢寘在樞鈞之地夙夜勞止功效炳然及解去于繁機用優崇于禁職竝延升于別殿或倚任于輔藩時望益隆朕心所簡不有殊典曷寵雋臣天轄之崇維正于八座夏卿之貳典幹于七兵竝用褒優益彰峻重當體尚賢之意惟勤進律之恩時我舊人豈煩多訓禮部侍郎王淑可起復舊官制

敕具官某喪雖至隆禮有權奪閔氏孔門之高弟起而服戎方進

漢家之名儒除以視事蓋敦先于公義難取究于私恩以爾文號
辭宗學爲祭酒善朝廷之大冊識臺閣之舊章祕殿入聯備咨詢
于政體經帷參侍倚勸講于朕躬遽嬰陟岵之哀越在倚廬之制
衰羸卒哭焦毀過人自解去于近班實想聞于奇論用復禁嚴之
綴當明挹仰之懷弭痛茹荼從宜腰經尚修職業之舊勉移忠孝
之圖往服朝規無徇己志

向傳師可光祿少卿制

敕賞以申信治體所先恩不遺功勞臣用勸具官某才志强濟行
義純篤資扶陽之世德達仲由之政事劇煩參試明練著稱日者
京左之輪將值朔陸之荒敞而能虔尺一之命體公上之急輶車
轉餉流馬繁興糧道有裨績用可紀賞許再期而遷秩適以少列
而守藩爾勞居多朕言不食夙期且及襄效用甄就進貳于內卿
仍宜條于岐下官儀亞河海之重故事掌宮掖之嚴往服寵優勉
思云補

呂士龍可衛尉少卿制

敕均二蜀之雄通爲襟要亢一方之任舉屬才明惟臨遣之著恩
宜褒嘉之進典具官某器資詳敏性業淑均早濟美于德門又潛
華于郎省按外臺之計職風政以修佐司會之版征事條乃舉屬
梓潼之缺守控梁益以須能將寄遠人之和無踰久吏之敏列卿
居棘路之重衛尉掌門禁之嚴用峻官儀且光藩綬勉著肅清之
最益昭毗倚之懷

陳宗元可司農少卿制

敕某漢制二千石治有異迹或就增爵秩或入爲公卿所以詳試
治民褒勸循吏以爾公力幹舉政事練更比經拉任之方抑推資
望之舊中臺久任右蜀上計灼存底績之效舉合陟書之條不有
褒恩曷勸勤吏升亞列卿之秩往司庶士之生茲爲稷官尚委藩
榮勉致庇民之效務揚守土之風鎮率吾恩懋承而職

張太沖可司農少卿制

文身六
三
敕某稷爲大官扈實農正沿置九卿之副濟成三務之宜匪有積
勤疇亞尊秩以爾賦外服之政比更列郡正中臺之秩數遷右曹
所至則條教頗修視成則閱閱可紀超從司駕進貳大農已脫郎
署之潛勿輕軍壁之小益當懋勉無忝褒嘉

韓絳可三司戶部判官制

敕某四方計書悉上會府九畎經入分領官曹必擇僚職之良參
幹土圖之掌以爾格量方厚才章典蔚善繼名門之韻高取俊等
之科置在道山試以都府亶無通事沛有餘力適資游刃之效復
委左民之煩土均斂收邦賦根本非如未利而已抑亦大計賴焉
慎簡乃才往踐厥位

楊畋可三司戶部判官依前直史館制

敕財府之煩分條于計職地官之屬參校于版征必賴器能以濟
事典具官某謙退不伐深博有謀忠孝自將歷險夷而不改文武
更用當劇易而靡辭久宣領服之勞實靖邊隅之警比資術學之

力擢參文史之筵屬司會之曠僚賴時髦之濟務廣中外之更試
成久大之蘊崇滋懋乃誠勿替于素

王罕可充戶部判官制

敕某司會爲府總集計文地官有聯參制斂法協司泉賦咨擇雋
髦以爾莊重弗流開敏胥濟早階門業之勝亟踐朝闈之華居官
不煩去輒見愛按章所至多著平反蔚有循吏之風播厥輿人之
頌攝居才局倚辦詔求自以避親之嫌形于補外之請主計之請
有薦選眾之議亦同宜真領于版圖往敷宣于風力毋廢朕命益
懋乃官

趙及可尚書左司郎中制

敕漢家更試之法皆攷治功唐制侍從之勞咸著最令惟時延閣
之產佐我列藩之雄奏計甚優推賞宜渥具官某恬能持正介不
害通屢有辭職之高稔聞行己之美曷圖澹退就擢祕嚴資儒者
之多聞俾參持橐賴吏師之兼敏尚委臨州居多愛利之風洽著

休嘉之績潛郎署而且久質官薄而當遷超從劇部之前升冠都司之右秩惟峻重恩在褒嘉尚圖滿課之成庸對寵章之懋何知至可度支郎中制

敕某朕總馭官師博研行義嘉乃冲恬之德異于躁進之風特越常均用敷褒典以爾率修士操究治吏文早懷膚敏之才亟踐雋良之選進升位著更試政條治財府之煩未嘗遺力任計臺之劇彌復竭精在績效以章明知性懷之澹退官遷久滯朝論僉俞履尚可嘉恩章宜及中臺支度特正于名郎外部將輸尚繫于大使就服褒華之命益宜清恪之誠

張揆可兵部郎中制

敕朕開邇英之講延稽古之流瞻言進讀之臣久勞侍從之事且優學力用峻官儀既以懋功亦惟重道某深中篤行強識博聞詢事攷言早延升于內閣執經摘句亦參侍于講帷蔚有通儒之稱雅著素絲之節褒嘉有典陟恪爲勞超敘七兵之華兼妙一臺之

選尚繫近職勿替納忠

張勛可兵部郎中制

敕某朕日者旣祀明堂還御層觀因祖宗配侑之重與天人交感之符乃推曲恩汎澤庶位擢爾以秋官之屬委爾以漕職之煩雖新秩已遷而舊課未陟賞宜從重勞則不遺况爾承相閥孝謹之風有書林清介之望亦已久次何愛一官夏卿首曹中臺妙選併伸褒寵益在欽祇

周湛可刑部郎中制

敕某朕攷內外吏治之實合前後官籍之勞率計閏成差覆秩次用孚恩格茲謂彝章以爾系承汝穎之餘奮絲漢沔之秀強記通于墳策精力究于事經比典漕于賦車再部煩于財府幹用肅給最效著明升自秋臺之聯仍從左戶之掌坐本曹而則廢領他部而有來往虔朕恩勉修而職

趙良規可刑部郎中制

敕某朕遠采漢官設刺舉之使參用唐制攷將漕之最以爾濟名門之美預冊府之游中校典圖有辯章訂正之益外宣條教著監司按察之勞賦輿行增方輸錯出書林之次亦已久秋臺之秩用以遷進掌邦刑增峻使範尚倚臨于外計勉成績于前勞

廖詢可都官郎中馮振可都官員外郎制

麟

敕某等朕設課吏之格較比民之績申唐虞之簡舊去漢魏之煩密均用一閏參比眾功爾等體行清修風力强濟自服王官之序屢試吏資之能分握符書臨長藩服上計文而可紀應攷法以當遷宜正秋臺之聯進丞郎省之務取稱懋官之典勉修良翰之風鄭有章可比部郎中制

敕某朕以二蜀之地介在坤隅守吏有勞計年未滿聽先期驛上就增厥秩所以優遠吏恤西人也爾以風政之敏兼操行之修數領郡章今握州契著惠和之顯迹應攷課之成法惟秋聯之屬有比計之句華于臺選寵示官成尚祇擢敘之恩無廢操修之志

劉立德可屯田郎中郭輔治可兵部員外郎制

敕朕大比庶工之治通視一閏之成計勞以遷在法惟允以爾立德精明肅給吏文有餘以爾輔治清修謹質士範無闕竝繇俊茂之選咸著休令之名至于握守符持漕節宣我勤約之詔通爲按察之官校課旣優陟典奚愛敘正墾田之秩稍進外兵之員胥獎成勞咸服休命

關詠可屯田郎中趙秉可職方員外郎制

敕某等夫治以得人爲本而守長尤難官以稱職爲賢而名實須允我疇吏伐第進省曹胥獲美才咸進褒典以爾詠性度閒遠履尚清修以爾秉識致疏通志用開敏率自雋良之舊屢試劇煩之能進服臺聯外握符寄虔我典刑之守濟于文雅之風或海沂以康賴隄闕之利或徼外無撓濟遠夷之安列上年庸稔于朝聽正以墾屯之秩職諸方貢之宜竝號名郎且旌良翰益樹終更之課勿忘甄陟之恩

章參可屯田郎中趙永裕張肅竝可屯田員外郎制

敕某等孝宣之治信賞而眾職理京房有言舉功而萬化成政平吏良繇此物也朕率由舊典詳試庶工褒勸勤庸以風內外以爾參行義深篤以爾肅風節清修以爾永裕出舊德之門有名駒之質竝奮由士彥而稔服朝聯典城臨民莅官行政節以廉著治用最聞列上年庸胥攷法中臺之選起草爲華右曹之煩墾田居劇或進正員之重或峻副郎之選竝寵清流茲爲茂典益圖敏政庸對陟恩

職方員外郎董公產可屯田郎中比部員外郎馬中庸可駕部員

外郎屯田員外郎黎持正可都官員外郎國子博士司卞盛和

仲竝可虞部員外郎太子中舍人張璿可殿中丞制

敕具官某設官以等則眾職舉有勞者進則羣臣勸歷古爲制茲道實先以爾等服在朝聯夙推幹裕歲月之效甫臨比最之期閱之資亦應敘遷之典遞增美秩用獎久勤益念修方以圖來效

樂許國可水部郎中韓儼可都官員外郎葛禧可國子博士嚴慶

孫劉世昭竝可殿中丞制

敕某等夫堯之命官咸試以職漢之進吏皆更治民績用有成實行不謬以爾等或自致榮級或食其舊德率用力官之敏進服班朝之聯外賦政經分幹事局悉上計年之最來援攷課之法稽參無缺旌陟乃宜敘正司川之名稍遷都隸之局成均典教中盾爲丞竝疏褒勸之恩尚勵端廉之操

劉宏可三司檢法官制

敕某夫士之秀者節亦清焉奉壽母以孝聞參賓籌而名劭朕以會計之府事劇訟繁傳致爰書屬在能吏會法官之來代命銓部以選充齎伐來聞便與廷見更試甚敏操決稱平俾居憲局之真益究刑章之習

文恭集卷十六

文恭集卷十七

外制

高若訥可特授金紫光祿大夫行尚書戶部侍郎依前參知政事
加上護軍進封北海郡開國侯加食邑五百戶食實封如故制
敕朕卽祕寢之嚴講總章之祀用鄭氏之說合祭六天廣周家之
文竝配三后禮行而孝思服誠感而瑞應通惠我無疆之休肆于
時夏之美實賴贊襄之助豈特寡昧之能我均蕃禧理先近弼具
官某志經道術性合明誠通于古今之宜蘊茲久大之業嘗敷陳
于往行預講勸于便朝亦刺直繩俾專憲席入膺樞筦之任而四
鄙晏然進陪巖政之裁而三階穆若相予蠲潔于使劇煩賴多聞
折衷之明贊先庚經置之敏事典無闕于素齋祓有加于精晷言
陪輔之勞用疇覃施之典貳于左戶亞爲上卿參授勳階併疏井
賦竝爲渥異之數且旌顯相之勤往承厥休益底于道
趙槩可特授尚書右司郎中天水縣開國子加食邑五百戶制

敕朕攷我將之詩以修宗祀奏成安之曲以虔右饗祖考來格于
孝天地竝貺以福因以疇覃施之典于以先拱侍之勞具官某德
全于純器本乎厚有匪躬審正之操穆乃朝言有書命深淳之辭
孚于邦號試以煩而竝效視諸履而畢修出以備于行人遠自使
材之美還乃正于羣僕翊成齋輅之和佳績茂焉熙事竣已用敷
純嘏之錫以圖陟恪之勤進席都司兼行真賦竝爲褒等如階級
卽云茂
級如勳卽
云軌級之異益思宿業之方

張方平可特授給事中進封清河郡開國侯加食邑五百戶制
敕夫孝莫大于嚴配禮實重于宗祀朕被飭厥典著定其當攷成
命于頌而合祭天地稽奮豫于易而參配祖考惟神靈嘉饗之至
蒙天人信順之助休成均貺內外一焉矧吾名臣可稽茂典具宮
某學術通博體識峻明有雅健閑深之文發揮典冊有幾微精密
之用洽暢事經曷自禁林入都憲席疇以偉望總治計文早宣濟
于本朝適倚臨于南夏教條克舉貢助甚勤屬熙事之展成思汎

恩之均被就伸向瑣之拜兼圖體國之勞勿替而忠且欽吾賞

狄青可安遠軍節度觀察畱後加食邑五百戶周美可檢校兵部

尚書耀州刺史充侍衛親軍步軍副都指揮使耀州觀察使加
食邑五百戶實封二百戶制

敕朕攷崇祀于古行孝饗于朝三神顧諟而降康四海駿奔而來
助思與內外均穆善祥以爾青氣節毅然智略明甚以爾美寬能
馭眾勇善知方竝積用邊勞而更制戎要留總後事將我勁兵參
衛巖除譏呵行在外嘉綏靖之效中圖拱翊之勤咸因休成第用
甄表進易翰垣之重衍食井賦之饒冠以勳名茂茲恩數往領朝
賞益勵宏圖

曹侂可檢校工部尚書鄆州刺史充天平軍節度觀察畱後加食

邑五百戶實封二百戶張茂實可檢校工部尚書處州管内觀
察使加食邑五百戶實封二百戶制

敕朕具法物之駕謁文祖之廟還卽齋寢遂享大神三祖侑焉羣

元萃止委茲瑞福澤于臣工瞻言綏靖之勞宜厚休成之慶以爾
份勳閎莫二雄毅自將以爾茂實志蹈厥忠材經于武竝曉暢軍
事亦更試邊勞分提巖下之兵參領禁中之衛或撫臨藩服以宣
外禦之勤或拱扈乘輿而濟中嚴之肅吾祀祗若爾庸茂焉用進
勳名就更閫制益昭連帥之重且旌恩禮之殊勿替忠勞往承寵
渥

李端懿可華州觀察使加食邑

此食邑下無戶數以
下文例之當有脫文

李端愿可

檢校工部尚書越州刺史充本州團練使加食邑五百戶實封
二百戶制

敕某等朕宅房心之野實惟明堂卽太紫之廷紹修宗祀齋明嚴
配肅雍永享乃獲神靈之休亦繫師帥之助會成熙典均汎祥釐
眷言勤共宜有勞賚以爾端懿人地標勝德器邃沖以爾端愿性
資淑均志局開敏竝爲戚畹之令早承慶閎之華厯侍近嚴見稱
競爽竝峻觀風之使範咸奉列侯之內朝逮元祀之講修委親兵

而侍衛能濟中嚴之肅亦伸外禦之勞乃庸居多吾賞斯進對易
翰垣之重參升勳爵之榮滋峻等威咸服恩數

范全可檢校工部尚書解州刺史充本州防禦使加食邑百戶王
凱可檢校工部尚書隴州刺史充本州防禦使進封太原郡開
國侯加食邑五百戶制

敕具官某等咸以武幹各總將兵積用勳勞遙分侯奄屬涓成于
元祀乃汎舉于慶恩遷領強藩衍增眞賦仍益校聯之美悉欽朝
賞之華

柳植可特授尚書刑部侍郎加上柱國制

敕朕惟軒祖有明庭之祠夏后有世室之饗攷舊于古制宜于今
炳縟多儀齋明盡志蒙神靈之右饗因福嘏之來同均霑汎恩畢
周庶位矧茲近侍之舊宜先慶典之覃具官某行本端方體資質
重禁林之孚號嘗預發揮憲席之持綱亦資糾正比賦四方之治
屢上三最之文淮海保疆土田上錯謹乃包茅之貢助茲休燎之

成峻貳秋卿參升勳等若加階卽云勳級竝爲均施之美且旌述職之勞

往承厥恩勿懈于位

張昇可特授尚書工部侍郎加上柱國向傳式可特授給事中制
敕周以宗祀來四海之助漢以明堂受諸神之釐朕攷舊修饗盡
志告虔祖宗孚忱神靈畀祉因以均曲施之澤時則厚近省之臣
以爾昇蔚爲吏師資有賢業以爾傳式器行居厚資術本優竝以
卿材之良升于王國之選或以奉公精力屢治邊郡之輪將或以
濟物惠心迭奉藩房之刺守江西之計已集橐關之最亦聞屬齋
薦以承神竝虔恭而述職式需熙成之慶爰圖貢助之勤進貳冬
官之卿入膺暮瑣之拜參加寵命優示恩章往孚于休勿懈于政
曾公亮可加柱國制

敕朕思法令之出協方俗之宜命取舊文裁定新制且究一時之
便用先三日之庚乃睠侍臣領茲近局適第成書之賞特旌覃思
之勞具官某體識淹通才猷敏濟稔更文翰之職寢研法律之微

勳被詔以修書能約文而從俗體我省方之至協茲下令之源閱
刊定之有條在褒嘉之宜及進優勳等加示恩章

李球可內殿崇班李玘可內殿承制制

敕某等內寢之聯視諸朝秩外家之貴體自朕躬主于拜除宜在
優異爾等戚畹貴種仙李真枝被長君退讓之風承鄧氏法度之
教咸自修綜莫不柔嘉久從班籍之編名未稱小侯之立學宜峻
近庭之秩且光左相之賢往服寵褒益思淑慎

霍保安可樞密承旨南班賈德明可樞密承旨帶南班小將軍制
敕某等夫樞宥惟重實總于幾微音旨所承尤資于篤慎以爾保
安材敏而濟以爾德明性謹且和竝隸幾廷預聞密政蹈箴規而
無忽習事典而有餘歲勞自陳府奏來上差進右曹之掌兼增武
弁之榮用獎恪恭益思敦勉

馮易簡可內省內常侍制

敕某履尚謹溫資性沈密久服掖塗之祕屢當頤指之煩銜命必

恭束身無過念施勞之累稔俾解籍于長秋特優內侍之名出次西聯之舊往祗褻渥勿替莊修

伊恕可御前忠佐制

敕某少壯初服果敢知名積以功勞使于宿衛暮年行及衰病日侵尚嘉宿勤差降下列仍優刺部之重亦承環衛之嚴往服寬恩勉伸餘力

吳幾復張碩賈章蔡抗竝可加騎都尉張太初可加輕車都尉制敕朕以四方殊俗萬事異宜將體流水之源以布異風之令俾爰立制亦既成書有嘉編削之勞用舉甄褒之典具官某等雅有學尚蔚爲才髦參奉詔文對刊法制尤邃科舉之習竝通事典之經適乃物宜裨成治體已擢升于器任仍敘進于勳聯往服茂恩益宣美業

單州團練副使范仲回可騎都尉制

敕某曩以不修簠簋嘗坐簡書削茂秩于儲闈降副車于列郡涓

成宗祀汎施曲恩宜加敘于聯勳尚勉思于往過

麥允言可景福殿使制

敕國家沿祕寢之名參置使範寵信臣之效增峻官儀矧親近而有勞在裒榮而惟允具官某才資畢給忠力自將領嚴除宿衛之嚴居惟無過預叛壘討平之策時則有功爰當舍爵之初已峻廉車之重朕近乘國政之暇因攷星緯之書惟是渾天之儀以及璇璣之法曠年祀而不講恐日官之失傳因命討論俾爰典作匪愆厥素適觀乃成智思引于淵微規摹造夫精密覽嘉今績圖用舊勳益進殿塗之聯彌光貂省之任尚敦忠恪哀對寵靈

張亢可客省使加食邑三百戶制

敕總章廢饗之已久攸司倚席而不談朕攷希闊之文建廣大之祀先格太室還祀合宮神靈居歆天人竝貺均布福嘏汎澤臣工具官某策名時髦授寄儒帥功名已大資雄略以爲能富貴自知蘊壯圖而有素游委制邊之任洽聞禦侮之勞夷險弗更致爲可

尚屬覃朝慶益衍戶封其在懋承勿忘式遏

向傳範可四方館使制

敕朕選卿族之良主禁闈之謁宿衛久而無過陟恪勞而未圖會
求試于藩房念積勤于軒幄思廣踐揚之美用推委遣之恩具官
某體韻詳和識業明濟早繇盛闕之選入聯外邸之姻過賴器能
擢居局禁宣詔命而惟久練事典而克精比更眾職之煩間修二
國之好專對不撓絜矩無渝屬安世有持橐之勞而耿純興治郡
之請稍遷近職用委強藩矧方貢之是司在使聯而則重參領符
竹往賦教條勉申汝能益稱朕意

綦史宣可遙郡團練使仍舊禮賓使制

敕某別都分建軍籍實繁和壘訓齊戎國爲重爰進升于使範用
分寄于武鋒以爾深厚有謀謹孚無過侍于禁近早著宿衛之勞
嬰以劇煩屢宣強敏之用曷以敷施之地屬當靈武之衝俾領護
于營兵克底綏于邊郡更書已及陟典宜加惟全魏之帶河有離

宮之管籥就增戎秩往涖兵鈐益資更練之才式爾倚毗之志無
忘亮節益體茂恩

張岳可東染院使張僕可禮賓使制

敕具官某朕睠典戎之臣居被邊之任有勞可紀久次未遷用均
其恩差進以秩以爾岳名有武幹習知戎略新秦介在河外委之
監軍以爾僕勇且知方恩能撫士常山臨控代郡任以護兵竝資
馭眾之才咸著綏邊之效用旌軍最爰正使聯爾勞伐之勿遺表
寵臨之特出尚圖忠力各推精誠

任守忠可宮苑使加輕車都尉宗志聰可左騏驎使加食邑鄧保
信可右騏驎使加食邑武繼隆可皇城使加上騎都尉制

敕祀所以孚誠昭孝通神明者也朕攷宗祀于古復孝饗于朝裒
對上靈昭升尊配翕受敷錫緝熙純嘏則亦親信之任有忠力焉
以爾守忠信則謹孚才本彊濟以爾志聰篤在誠亮敏有幹局以
爾保信精明適用端粹自持以爾繼隆習練事經休有風力竝用

勞舊參試劇煩入司宿衛之嚴預我齋祠之事乘輿所次部分有
條行在肅如拱衛顯若逮成熙事宜有勤庸均穆祥釐大伸茂典
竝優使範之陟兼從并賦之加且旌陟恪之勤往服褻華之寵
錢晦向傳範竝可東上閣門使加上騎都尉制

敕具官某等夫德盛者流光文繁者禮縟朕昭孝宗祀纘戎竝配
具法物之駕奏成安之典神靈咸喜天人竝貺升燎之夕協氣薰
蒸用均祥釐宜先近侍以爾晦器用純備材資敏通以爾傳範性
業淑均志慮沈邃竝爲慶閱之令參侍朱閣之華曉暢事經嫺習
儀矩比膺專對之選蔚有將命之稱交試劇煩悉昭幹裕逮九房
之講祀因干乘以闡儀周圖親信之勤委以譏呵之任行能肅若
嘉績茂焉會熙典之休成推汎恩之均施稍遷使範益進勳名用
甄拱侍之榮往服褻嘉之寵

王中庸可引進使王果李中吉可東上閣門使竝加輕車都尉
宗說可西上閣門使英州刺史李珣可東上閣門使加上騎都

尉制

敕朕以季秋吉亥循復饗典纘戎祖考對越天地告虔盡備物之
志委瑞有如山之崇汎推曲恩以澤庶位王中庸等或以材武膺
器使或以地胄參近侍練更禁局之要分制邊部之衝資有策謀
交著聲績迨熙成之均渥睠禦侮之有勞進增使範之華申加勳
等之授往欽慶施滋勛忠圖

曹修可東染院副使兼閣門通事舍人制

敕某遮扞外虞在西州而爲重宣納禁職于上閣而特清以爾家
本元勳世濟忠略關隴懷于遺愛羌虜懾其餘威固原控邊勁兵
要處爾則材武繼其家聲委以軍符鎮茲戎壘善拊循于士伍能
底靖于疆陲特寵禁闈之名仍優染翟之介勉思靜勝之算當循
武穆之爲就服茂恩思濟先業

西京左藏庫副使高遵裕可依舊西京左藏庫副使兼通事舍人

制

文身
敕某惟上閣贊司之職蓋右列清要之塗非夫材稱顯聞不得兼
領以爾勳門華緒內使宿名久戍邊防克奮忠毅夙圖上略嘗聞
善謀守固封疆方收遠績擢預典儀之秩用增武爵之榮益思盡
規以答殊寵

馬懷德可西上閣門副使制

敕某惟朱華之上閣當太微之法宮置副介之名用承諸使慎尺
一之令必取有勞乃先外禦之圖式稱至公之選以爾俊雄韞氣
沈毅有謀得牧人馭眾之方著憂國奉公之節比更邊郡參任兵
鈐卒乘講修行陣和睦士夫懷附戎索底寧予錄乃勤命進以秩
遷貳禁閤之要尚委列城之衝職美于中恩不遺遠益圖忠槩茂
對褒章

柴貽範可閣門通事舍人制

敕某謁者之任掌賓贊受事攷功之法用宣納爲最必闕舊儀之
習乃揚近職之榮以爾辭令敏修力局幹舉再隸朱華之閣久侍

赤墀之塗篤在首公勤于補過曩圖專對之善亦嘉更練之能出
講鄰驩導迎使聘訖無通事亶有積勞特升贊于殿中往服勤于
朝次勿忘勉勵以對褒遷

李推實可閣門通事舍人制

敕某舊典通事本隸西臺近制建官則領朱閣非善音吐有姿範
者不得預于此選以爾出簪纓之後侍軒闈之下久典贊謁十更
年序鄉經陪祀之慶依從升秩之科願回霈恩稍遷近職爰念服
勞之舊特推從欲之仁益升華近之聯勿忘宣納之最併圖肅恪
用對褒嘉

孫用可左藏庫副使王日宣可禮賓副使王克讓任守素毛永保
竝可內殿承制制

敕某等夫護營卒邏邊警式遏外侮通爲兵官稽歲勞校軍最差
進茂秩抑惟邦典爾等膺材武之選有力局之用數更委使見稱
疆敏齎伐自列應書當遷司帑別都典客近局或從耆定之峻而

承音制之重率由功次咸用詔除尚繫拊循以底綏靖
李緯可莊宅使制

敕某夫守邊之吏若篤在首公則有國之規亦醜于用賞以爾選
自材武名有智謀嘗治軍行亦任城主能均士卒之苦頗得夷落
之和乃睠朔藩實為裔壤雖守和戎之策尚厚宿兵之屯適委撫
循自陳勞最用篤疆臣之勸特優使範之遷今鄰好方堅邊事不
聳宜修耕守之備務先安集之方當竭爾忠何愛吾賞
郭承宗可六宅副使制

敕某承地胄之華資器能之敏參內庭之使介練近局之事條能
寡悔尤頗著風力既得處躬之善復嘉營職之勞疇用年庸升亞
使秩往服褻遷之渥勿忘臨履之修

孫昂可宅副使制宋有六宅副使莊宅副使等官此宅副使上疑有脫字
敕某朕曩以右饗大神咸澤庶位覃厥休成之典擢爾副介之名
仍聞守邊業有滿課詳觀閎閣之上乃在詔書之前重遺成勞申

加茂秩用究臺恩之美益聯使範之華矧早負于忠圖當益躋于
遠略底寧疆事取稱朕心
馮承用可供備庫使制

敕某朕以洛宅之右陵宮所安永言孝思分置官守嚴奉歲時之
薦用均霜露之懷以爾早勵恪勤洵膺委使罄一心而營護歷四
稔以終更亶無尤違前有比例宜正名于大使用率職于近廷且
旌灌柏之勞當職出綸之渥

趙滋可供備庫副使制

敕某朕以山東土俗勁悍多盜臨緇負海為一都會安輯勞來高
選時望乃今守將前吾樞臣言爾警邏彼方肅清所部材勇可任
方略甚明多翦兇渠善遇士卒嘉聞來薦亟用賞勞度越常均超
介諸使益圖自效就虔吾恩

胡稹可供備庫副使制

敕某通班朝寢授任嶺隅屬小醜之跳梁提支兵而討撲被堅能

力獲級有勞還奉更書來援勳籍特寵使聯之介且旌軍最之優
勉竭爾思往承吾渥

盧昭度可供備庫副使制

敕某有著在庭以能任職頗立勤效實應陟科用遷副介之聯式
示褒嘉之命尚圖忠力取稱恩章

李保信可供備庫副使制

敕某預祕寢之聯視外朝之品比資武幹適委邏兵能謹視于寇
偷頗肅清于鄉部通稽宿課參敘今勞擢居使介之聯就壯軍行
之領尚圖忠力懋對恩章

劉允濟可供備庫副使制

敕某睠彼關南控于塞下重兵畱戍夾河置防爾早以幹資給吾
煩使伺軍中之動靜覘疆外之幾微比及終更多得要領擢升副
介之列且旌馳奏之勞

張德志可供備庫副使制

敕某蹈謹畏之風進承中制資強濟之力參服外勞聿修無愆所
至有迹屬計年之課吏且齎伐以應書擢升使介之聯庸示朝恩
之茂益圖勤蓋以對褒嘉

許咸亨可供備庫副使制

敕某籍在殿塗是承中制任居邊部式遏外虞善拊循于士兵煩
宣著于材力修上最凡之目合于旌陟之科宜寵副聯往亞諸使
尚謹將屯之重勿忘繼武之和

全克勲可供備庫副使制

敕某敏頗有材謹且能力中承軒闈之制外護州藩之兵參敘積
勤亶無逋事宜疇吏課之最用優使介之聯就服褒嘉益圖勤蓋
王文顯可供備庫副使制

敕某通籍文陛假守姚墟以風矩之修資力局之幹德行頗舉士
兵兼懷上計有司應我攷法寵內庭諸使之副獎外屏守臣之良
就服臺恩勉思藩政

錢師回可供備庫副使制

敕某職承內制身服外勞邈居江鬱之溥近按島夷之悍長茲遠服撫我列城能和殊俗之心弗啓吾民之患宜疇賞格入副使聯尚惟忠力之圖虔茲恩典之茂

江從可供備庫副使制

敕某性質專良力局幹舉給吾左右之事涉于禁輿之塗沈密罕言端修寡過宣傳中制稔服內聯凝集成勞參應陟典俾升諸使之亞且承劇務之煩勿忘欽祗益圖云補

李允恭林宗普竝可供備庫副使制

敕某等開敏自將謹孚有裕竝資器幹之利參試材使之煩藉漢省珥貂之華泄周官司甲之職局事修舉績善著明特正供擬之使聯咸參副介之朝秩且賴宿官之久宜從增秩之畱往服褒恩益圖來裕

李琦可供備庫副使李瑛李琚李球竝可內殿承制制

敕某等朕以浚泉在詠懷聖氏之慈渭水興嗟增逝者之感眷言諸息洽被遺恩以爾等妙年自修沖規可尚參從貴里分籍禁庭罹蓼莪之在憂服苴麻而居制或聞摧慕良足哀矜覽遺表以泣然稽舊章而允若擢升使介進陟班聯恩乃究于外家義勿慚于前代勉思樹立姑務顯揚

周應可西京八作使制

敕某首列太醫參領儲使仍典水衡之職兼司都苑之嚴必葺有勞乃爲可紀閱監司之薦狀務開勸以推恩特超敘于崇資往欽祗于茂典

卷之三

Blank lined writing area with vertical lines.

Text on the right edge of the page, possibly a page number or title fragment.

